

# ESTATUTU PROIEKTUA

## BIZKAIKO PROKURADOREEN ELKARGO OSPETSUA

### I. TITULUA.-

#### XEDAPEN OROKORRAK.

##### **1. artikulua. Xedea.**

Estatutu honen xedea da Bizkaiko Auzitegietako Prokuradoreen Elkargo Ospetsuaren (BAPEO) antolamendua eta funtzionamendua arautzea.

##### **2. artikulua. Izaera eta nortasuna.**

1. BAPEO zuzenbide publikoko korporazioa da, legearen arabera eratu eta aitortua, eta auzitegietako prokuradore gisa dihardutenek osatzen dute <sup>1</sup>. Gizartearen eta elkar-gokideen interes orokorraren zerbitzura jardungo du, dagozkion funtzioak eta eskumenak gauzatuz.

2. Elkargoak nortasun juridiko propioa eta jarduteko gaitasun osoa du bere helburuak betetzeko <sup>2</sup>.

3. Bere antolaketa eta funtzionamenduan autonomia osoa du Estatutu honen esparruan eta Justizia Auzitegien bermepean.

##### **3. artikulua. Lurralde-eremua.**

BAPEOren lurralde-eremua Bizkaiko Lurralde Historikoa da.

##### **4. artikulua. Egoitza.**

BAPEOren egoitza Bilboko Mazarrero zumarkaleko 5. zenbakian dago.

##### **5. artikulua. Hizkuntza koofizialtasuna.**

Euskara eta gaztelania BAPEOren hizkuntza ofizialak dira, berdintasun-mailan, euskararen normalizazio-prozesua eta sustraitze soziala aintzat hartuta.

---

<sup>1</sup> Lanbide Elkargoei buruzko otsailaren 13ko 2/1974 Estatuko Legearen 1.1 artikulua (LEL)

<sup>2</sup> Tituludun lanbideei eta profesionalen elkargo eta kontseiluei buruzko Eusko Legebiltzarraren azaroaren 21eko 18/1997 Legearen 22. artikulua

## **6. artikulua. Funtsezko helburuak.**

BAPEOren funtsezko helburuak dira:<sup>3</sup>

a) Bere eskumenen esparruan, lanbidearen jarduna agintzea.

b) Prokuradoreen ordezkartza instituzional eskusiboa izatea bere lurralde-eremuan.

c) Prokuradoreen interes profesionalak defendatzea.

d) Deontologia profesionala betetzen dela eta elkargokideen zerbitzu profesionalen kontsumitzaile eta erabiltzaileen interesak babesten direla zaintzea.

e) Lankidetzaren bidez, Justizia Administrazioaren funtzionamendua sustatu eta hobetzea, bai eta lege prozesalek eta organikoek agintzen dizkioten funtzioak eta zerbitzuak ematea ere.

## **7. artikulua. Euskal Autonomia Erkidegoko administrazioekiko harremanak.**

1. BAPEOk harremanak izango ditu Euskal Autonomia Erkidegoko Administrazioarekin, alde batetik, Tituludun Lanbideei eta Profesionalen Elkargo eta Kontseiluei buruzko azaroaren 21eko 18/1997 Legean

jasotako izaera orokorreko alderdi profesional, instituzional eta korporatiboari buruzko gaiei dagokienez, eta bestetik, lanbidearen edukiari buruzko gaiei dagokienez. Lehen kasuan, elkargo profesionalen arloan eskumena duen sailaren bitartez jarriko da harremanetan, eta bigarrean, Eusko Jaurlaritzan justizia-arloan eskumena duen sailaren bitartez.<sup>4</sup>

2. Elkargoak, bere funtzio propioez gain, Euskal Autonomia Erkidegoko Administrazio Publikoak eta Euskal Autonomia Erkidegoko foru-administrazio eta toki-administrazio publikoek eskuordetutako administrazio-funtzioak ere bete ahal izango ditu, azaroaren 21eko 18/1997 Legearen 25. artikuluan aurreikusitako moduan.

3. Era berean, BAPEOk harremanak izango ditu Estatuko Administrazio Orokorrekin, Espainiako Prokuradoreen Kontseilu Orokorrekin eta gainerako erakunde eta instituzio publikoekin, eta dagozkion erakunde-loturak izango ditu haiekin.

---

<sup>3</sup> 18/1997 Legearen 22. artikulua eta LELren 1.3 artikulua.

---

<sup>4</sup> 18/1997 Legearen 56. artikulua eta 10. xedapen gehigarria

## II. TITULUA.- ELKARGOKIDEAK.

### I. KAPITULUA.- ELKARGOKIDE- TZEKO ARAUBIDEA.

#### 8. artikulua. Derrigortasuna.

1. Lanbidean jarduteko, BAPEOn sartu behar dute lanbide-egoitza bakarra edo nagusia elkargoaren lurralde-eremuan duten prokuradoreek.

2. Elkargoan sartuz gero, prokuradoreak Espainiako lurralde osoan jardun ahal izango du lanbidean. Elkargoak ezin izango die inolako komunikaziorik edo gaikuntzarik eskatu elkargokide ez diren beste lurralde batean lan egiten duten profesionalei, ez eta kontraprestazio ekonomikorik ere, baldin eta kontraprestazio horiek, normalean, elkargokideei eskatzen badizkiete onuradun diren zerbitzuak emateagatik, eta elkargoaren kuotak estaltzen ez baditu.

3. Elkargokide ez diren beste lurralde batean burutuz gero jardun profesionala, BAPEOri dagozkion antolamendu-eskumenak eta dizipli-

na-ahala erabiltzeko, kontsumitzaile eta erabiltzaileen mesedetan, Zerbitzu-jardueren eskuragarritasun- eta erabilera-askatasunari buruzko azaroaren 23ko 17/2009 Estatuko Legean aurreikusitako komunikazio-mekanismoak eta agintaritza eskudunen arteko administrazio-lankidetzarako sistemak erabili beharko ditu BAPEOk.<sup>5</sup>

#### 9. artikulua. Kokatzeko eta zerbitzuak emateko askatasunak.

Europar Batasuneko edozein estatutan ezarritako profesionalen jardun iraunkorra eta aldi baterako lekualdaketaren kasuan zerbitzuak ematea Europako Erkidegoko zuzenbidea aplikatzeko indarrean dagoen araudian xedatutakoaren arabera arautuko dira.<sup>6</sup>

---

<sup>5</sup> LELren 3.3 artikulua, 18/1997 Legearen 39.1 eta 4. artikulua eta BJLOren 544.2 artikulua.

<sup>6</sup> 18/1997 Legearen 39.1.2 eta 40.2 artikulua eta LELren 3.4 artikulua.

## **10. artikulua. Elkargokide-izaera eskuratzea.**

1. BAPEOn sartzeko beharrezko baldintzak dira:

a) Zuzenbidean lizentziaduna edo zuzenbideko graduako unibertsitate-titulua izatea. <sup>7</sup>

b) Auzitegietako prokuradorearen lanbidean jarduteko gaitzen duen lanbide-titulua izatea, Abokatutzan eta auzitegietako prokuradoreztan sartzeari buruzko urriaren 30eko 34/2006 Estatuko Legean xedatutakoaren arabera.

c) Prokuradore lanbidean aritzeko ezgaitasun, gaitasungabete, batezintasun edo legezko debekurik ez izatea.

d) Elkargoko zehapen irmoagatik prokuradoreen elkargo batetik kanporatu ez izana.

e) Ez izatea abokatuen elkargo bateko jarduneko kide aldi berean. <sup>8</sup>

2. Aurreko apartatuko b) letran aurreikusitako baldintza exijitzeak ez dio kalterik egingo Estatutuaren lehenengo xedapen iragankorrak ezarritakoari.

3. Eskatutako titulazioa dutenek eta aurreko apartatuan ezarritako

baldintzak betetzen dituztenek elkargoan onartuak izateko eskubidea izango dute. <sup>9</sup>

## **11. artikulua. Sartzeko prozedura.**

1. Gobernu Batzordeak hilabeteko epean ebatzi eta jakinaraziko ditu elkargoko kide izateko eskabideak, eta aurreko artikuluan ezarritako baldintzak betetzen ez direnean bakarrik ukatu ahal izango ditu. Batzorde horrek kide bati eskuordetu ahal izango dio eskumen hori.

2. Gehienezko epe hori igaro eta Gobernu Batzordeak ebazpenik jakinarazi ez badu, eskaera baietsizat joko da.

3. Ebazteko epea eten ahal izango da, gehienez ere bi hilabetez, aurkeztutako dokumentazioan dauken akatsak zuzentzeko edo egiaztapen egokiak egiteko, horien benetakotasuna eta nahikotasuna egiaztatze aldera.

4. Elkargoan sartzeko ukapena arrazoitu egin beharko da, eta hilabeteko epean aurkaratu ahal izango da Euskal Autonomia Erkidegoko Prokuradoreen Kontseiluan, jakinarazi eta hurrengo egunetik kontaktzen hasita, Estatutuaren IV. tituluko

---

<sup>7</sup> Abokatutzan eta auzitegietako prokuradoreztan sartzeari buruzko urriaren 30eko 34/2006 Legearen 2.1 artikulua.

<sup>8</sup> 34/2006 Legearen 1.4 artikulua.

---

<sup>9</sup> LELren 3.1 artikulua.

I. kapituluaren xedatutakoaren arabera.<sup>10</sup>

## **12. artikulua. Elkargokide-izaera galtzea.**

1. Honako hauek dira elkargokide-izaera galtzeko arrazoiak:<sup>11</sup>

a) Borondatez uko egitea.

b) Izaera hori lortzeko baldintzak ez betetzea jatorriz edo gerora; behar bezala egiaztatuko da.

c) Elkargoaren kontribuzioak ez ordaintzea.

2. Elkargokide-izaera borondatez uko egitearen ondorioz galtzeak ez du iraungitzen elkargokide egiteko aldiaren izandako diziplina-erantzukizuna. Baja eskatzeko unean diziplina-prozedura bat irekita badago, elkargoak aurrera jarraituko du horrekin, harik eta ebazpena eman arte. Zehapen bidez amaitzen bada, eta zehapen hori ezin bada bete, eten egingo da. Hala, berriro sartzen bada prokuradore-korporazio batean, orduan betearaziko da.

3. Aurreko apartatuko b) letran aurreikusitako kasuan, Gobernu Batzordeak, elkargoaren balizko baja eragin duten inguruabarrak egiaztatuko

du ondoren, interesdunari jakinaraziko dizkio eta entzunaldi-izapidea emango dio hamabost egun baliodunetz. Epe hori igarotakoan, dagokion ebazpena emango du, gehienez ere hilabeteko epean.

4. Eta c) letran aurreikusitako kasuan, Gobernu Batzordeak kontribuzioak ordaindu gabe dituela adieraziko dio interesdunari, eta entzunaldi-izapidea emango dio hamabost egun baliodunetz. Epe hori igarota, eta egindako alegazioak ikusita, ebazpena eman eta jakinaraziko du, gehienez ere hilabeteko epean. Hala badagokio, baja ematea erabaki ondoren, elkargora itzultzeko, zor diren zenbatekoak ordaindu behar dira, dagokion legezko interesarekin.

6. Elkargokide-izaera galtzeari buruzko ebazpena aurkaratu ahal izango da Euskal Autonomia Erkidegoko Prokuradoreen Kontseiluan, aurreko artikuluan elkargoan sartzeko ukapenaren inguruan aurreikusitako moduan.

## **13. artikulua. Elkargokide-izaera etetea.**

1. Honako hauek dira elkargokide-izaera eteteko arrazoiak:

a) Ebazpen judizial irmoz lanbidetan jarduteko gaitasungabetzea edo ezgaitzea.

---

<sup>10</sup> 18/1997 Legearen 42.1.d) artikulua

<sup>11</sup> 18/1997 Legearen 39.2 artikulua.

b) Elkargoko zehapen irmoaren ondorioz, lanbide-gaitasungabetzea.

<sup>12</sup>

2. Etendako elkargokide-izaerari eutsiko zaio etendura eragin duen arrazoiak irauten duen bitartean.

#### **14. artikulua. Elkargokidetzeari buruzko prozeduren ebazpenak elektronikoki izapidetzea eta jakinaraztea.**

1. Elkargoak beharrezko baliabideak izango ditu eskatzaileek elkar goan sartzeko edo baja emateko prozedurak bide elektronikoz izapidetu ahal izateko, Lanbide Elkargoei buruzko otsailaren 13ko 2/1974 Legearen 10. artikuluan aipatzen den leihatila bakarraren bidez.

2. Elkargoak berehala jakinaraziko dizkio altak, bajak edo elkargokideen etendurak, eta lanbide-egoitzen aldaketak Kontseilu Orokorriari, Elkargokideen Erregistro Nagusian jaso ditzan, baita Euskal Autonomia Erkidegoko Prokuradoreen Kontseiluari eta lurraldeko epaitegi eta auzitegiei ere.

#### **15. artikulua. Elkargokide motak. Zenbakia eta egiaztapena.**

---

<sup>12</sup> 18/1997 Legearen 17 artikulua.

1. BAPEOn sartutako prokuradoreek jarduneko edo ez-jarduneko izaera izango dute.<sup>13</sup>

2. Prokuradore bakoitzak elkargokide-zenbaki bat izango du, eta bere izaera egiaztatzen duen txartela edo egiaztagiria izango du. Izenpetzen dituen agiri profesional guztietan zenbaki hori idatzi beharko du, eta kide den elkargoa aipatu.

## **II. KAPITULUA.- Eskubideak eta betebeharrak.**

#### **16. artikulua. Printzipio orokorrak.**

1. BAPEOn sartzeak estatutu honetan jasotako eskubideak eta betebeharrak ematen ditu.

2. Auzitegietako prokuradore guztiak berdinak dira Estatutuan aitortutako eskubide eta betebeharrei dagokienez, hurrengo apartatuan xedatutakoari kalterik egin gabe.

3. Ez-jarduneko elkargokideek jarduneko elkargokideen eskubideak izango dituzte, lanbidearen jardunean zuzenean lotzen ez diren neurrian. Batzorde Orokorretan eta Gobernu Batzordeko kideak hautatzeko prozesuetan<sup>14</sup> eta, hala badagokio,

---

<sup>13</sup> 18/1997 Legearen 38.1 artikulua.

<sup>14</sup> LELren 7.3 artikulua.

zentsura-mozioetan emandako botoaren balioa jarduneko kideen botoaren erdia izango da.

### **17. artikulua. Elkargokideen eskubideak.**

Honako hauek dira elkargoko prokuradoreen eskubideak:

a) Organo korporatiboei beren independentzia eta egikaritzaskatasuna babesteko lanbide-jardunean babesa eskatu eta, hala badagokio, lortzea. Horretarako, eskubide hori urratzen dela edo ez dela ezagutzen Botere Judizialeko gobernu-organoei, jurisdikziokoei zein administratiboei, jakinaraztea eskatu ahal izango dute.

b) Elkargoaren gobernu-gaietan parte hartzea, Batzorde Orokorraren bilkuretan parte hartzea eta botoa ematea, gobernu-organoetako kide izateko hautatzeko eta hautatua izateko ahalmena, eta gobernu-organoetako titularrak kentzeko eskubidea, zentsura-bozketaren bidez, estatutu honetan araututako baldintzetan.

c) Elkargoko organoei eskaerak egitea eta kexak eta erreklamazioak aurkeztea, bai eta organo horien erabakien eta ebazpenen aurka errekurtsioa jartzeko eskubidea ere.

d) Gobernu korporatiboari eta interes profesionaleko jarduerari buruzko informazio erregularra lortzea, bai eta elkargoaren jarduera ekonomikoa islatzen duten dokumentuak aztertzea ere.

e) Zuzenean eragiten dieten agiri eta elkargoko egintzen informazioa eskuratzea eta, hala badagokio, horiek ziurtatzea.

f) Elkargoaren ondasunak eta zerbitzuak erabiltzea, batez ere lanbide-prestakuntzakoak eta -trebakuntzakoak, zehazten diren moduan eta baldintzetan.

g) Elkargokide-eskubideak bere osotasunean mantentzea, harik eta elkargokide-izaera eten edo galdu arte.

### **18. artikulua. Elkargokideen betebeharrak.**

1. Elkargoko prokuradoreek betebeharrak hauek dituzte:

a) Lanbidean zuzentasunez eta zentzu etikoz jardutea, eta deontologia profesionala betetzea.

b) Lege organikoek, prozesalek eta sektorialek ezartzen dizkioten legezko betebeharrak betetzea, lanbidea betetzean, eta, bereziki, jurisdikzio-organoekin lankidetzan eta elkarlanean aritzean, eta horretara-

ko bitarteko eta baliabide egokiak eta eguneratuak izatea.

c) Lanbidean diharduen epaitegi eta auzitegietara, jakinarazpenetarako saletara eta zerbitzu komunetara jotzea, jarduteko epealdi baliodunean, komunikazio-egintzak eta gainerako lanbide-jarduketak egikaritzeko.<sup>15</sup>

d) Elkargoko organoek emandako estatutu-xedapenak, arau deontologikoak eta ebazpenak ezagutu eta betetzea lanbidean jardutean.

e) Elkargoko organoen titularrei zor zaien errespetua izatea, eta, beren lanbidean dihardutenean, beren lankide, auzilari, letradu, epaile eta magistratuei, fiskalei, justizia-administrazioko letraduei eta Justizia Administrazioaren zerbitzura dauden funtzionarioen kidegoetako gainerako kideei.

f) Lanbide-jarduna antolatzeo elkargoaren funtzioak betetzeo beharrezkoak diren inguruabarrak, aldatetak eta gainerako datuak jakinaraztea elkargoari.

g) Lanbide-sekretua gordetzea.

h) Lanbide-bateraezintasunak betetzea, bereziki abokatuaren lanbidean aldi berean aritzeari dagokionez, Prozedura Zibilaren urtarrilaren 7ko 1/2000 Estatuko Legearen

23. artikuluan zehaztutakoaren arabera.

i) Bezeroari bere jarduketa profesionalen berri ematea eta emandako zerbitzuen kontuak ematea, jasotako zenbatekoak eta egindako ordaintzen kontzeptuak eta zenbatekoak zehaztuta.

j) Elkargoaren kontribuzio ekonomikoak garaiz ordaintzea, eta, hala badagokio, erabili diren elkargo-zerbitzuak ordaintzea, estatutuetako arauetan eta elkargoko organoek arau horiek aplikatzeko hartutako erabakietan xedatutakoaren arabera.

k) Hautatutako edo izendatutako elkargoko karguetan leialtasunez eta arduraz jardutea.

2. Betebehar horiek prokuradorearen jarduera profesional eta korporatiboaren beharrezko araubidea osatzen dute. Horiek betetzea da Estatutu honetan araututako kontrol-eta diziplina-ahalen berezko xedea.

---

<sup>15</sup> PZLren 26.9 artikulua

### III. TITULUA.- ELKARGOAK.

#### I. KAPITULUA.- FUNTZIOAK.

##### 1. ATALA.- FUNTZIO OROKORRAK.

#### 19. artikulua. Elkargoaren funtzioak.

Estatutuko 6. artikuluan adierazitako funtsezko helburuak lortzeko, Estatuko eta autonomia-erkidegoko legeriak lanbide-elkargoei, lege organikoiei, prozesalei eta sektorialeiei, estatutu hauei eta gainerako arau-xedapenei buruz esleitzen dizkion funtzioak beteko ditu BAPEOk, bere lurralde-eremuan.

#### 20. artikulua. Lanbide-jarduna antolatzea.

Honako hauek dira lanbide-jarduna antolatzeko funtzioak:

a) Elkargokideen erregistroa. Bertan, gutxienez, honako datu hauek jasoko dira: elkargokideen izen-abizenak, elkargokide-zenbakia, dituzten titulu ofizialak, alta-data,

lanbide-egoitza, helbide elektronikoa eta lanbide-gaikuntzaren egoera. Elkargoak doako sarbidea eskainiko die kontsumitzaile eta erabiltzaileei elkargokideen erregistrora, leihatila bakarraren bidez.<sup>16</sup>

b) Elkargoaren lurralde-eremuan egoitza soziala duten lanbide-sozietateen erregistroa. Elkargoak Kontseilu Orokorrari jakinaraziko dizkio egindako inskripzioak, Lanbide Sozietateen Erregistro Nagusian eta Euskal Autonomia Erkidegoko Prokuradoreen Kontseiluan jasota gera daitezen.<sup>17</sup>

c) Lanbide-jarduera zaintzea, lanbidearen etikari eta duintasunari men egin diezaion eta herritarren eskubideak behar bezala errespetatu daitezen.<sup>18</sup>

---

<sup>16</sup> LELren 10.2.a) artikulua

<sup>17</sup> LELren 10.2.b) artikulua eta Lanbide-sozietateei buruzko martxoaren 15eko 2/2007 Legearen 8. artikulua (LSL)

<sup>18</sup> LELren 5.i) artikulua eta 18/1997 Legearen 24.a) eta c) artikulua

d) Diziplina-ahala erabiltzea, lanbideari eta elkargoari dagokienez.<sup>19</sup>

e) Lanbide-intrusismoa eta lehia desleialeko egintzak saihesteko neurriak hartzea, ordenamendu juridikoan aurreikusitako ekintzak gauzatzuz.<sup>20</sup>

f) Lege orokorrak eta bereziak eta estatutuak eta erregelamenduak betetzea eta elkargokideei betearaztea, bai eta elkargoko organoek beren eskumeneko gaietan hartutako arauak eta erabakiak ere.<sup>21</sup>

g) Elkargokideei buruzko informazio-eskaerei erantzutea, bai eta ezarri dizkien zehapen irmoei eta horiei buruzko egiaztapen-, ikuskapen- edo ikerketa-eskaerei ere, baldin eta Europar Batasuneko estatu kide bateko agintari eskudunek egiten badizkiete, otsailaren 13ko 2/1974 Estatuko Legearen 5.u) artikuluan aurreikusitakoaren arabera.

## **21. artikulua. Lanbidearen eta elkargokideen ordezkariak eta defentsa.**

Elkargoak honako funtzio hauek izango ditu lanbidea eta elkargoki-

deak ordezkatzeko eta defendatzeko:

a) Bere eremuan, lanbidea ordezkatzeko eta defendatzeko administrazio publikoen, jurisdikzio-organoen eta gainerako botere publikoen aurrean, bai eta edozein erakunde, entitate eta partikularren aurrean ere.<sup>22</sup>

b) Elkargokideak defendatu eta babestea beren lanbidean jarduteari dagokionez, batez ere beren independentzia eta jarduteko askatasuna babesteari dagokionez.<sup>23</sup>

c) Profesionalen interesei eragiten dieten auzietan epaitegi eta auzitegietan jardutea, legeak ematen dien legitimazioarekin, eta kideen ordezkari gisa edo haien ordezpenez prozesal gisa jardutea.<sup>24</sup>

d) Edozein gai profesional eztabaidatzen den prozedura administrazio edo judizialean esku hartzea, hala eskatzen zaienean edo indarrean dagoen legeriaren arabera parte hartzea aurreikusten denean.<sup>25</sup>

e) Euskal Autonomia Erkidegoko arau-xedapenen proiektuei buruzko txostenak egitea, azaroaren 21eko

---

<sup>19</sup> 18/1997 Legearen 24.d) artikulua eta LELren 5.i) artikulua

<sup>20</sup> 18/1997 Legearen 24.k) artikulua

<sup>21</sup> LELren 5.t) artikulua

---

<sup>22</sup> LELren 5.g) artikulua

<sup>23</sup> LELren 5.g) artikulua

<sup>24</sup> LELren 5.g) artikulua

<sup>25</sup> LELren 5.o) artikulua eta 18/1997 Legearen 24.f) artikulua

18/1997 Legearen 54. artikuluan xedatutakoaren arabera.

f) Kontseiluetan, kontsulta-erakundeetan, batzordeetan eta administrazio-organoetan parte hartzea, horien arau erregulatuzaileetan hala aurreikusita dagoenean eta arau horietan ezarritako baldintzetan, bai eta nazioko edo nazioarteko erakundeenetan ere, hala eskatzen zaionean.<sup>26</sup>

g) Administrazio publikoek agintzen dizkion funtzio guztiak betetzea eta haiekin lankidetzan aritzea, azterlanak, txostenak, estatistikak eta beren helburuekin zerikusia duten beste jarduera batzuk eginez. Jarduera horiek eskatu ahal izango zaizkio edo bere ekimenez egitea erabaki ahal izango du.<sup>27</sup>

h) Gai espezifikoei buruzko eza-gutzak eskatzen diren edozein auzitegitarako ordezkariak izendatzea, hala eskatzen bazaio.<sup>28</sup>

i) Elkargokideen interesekoak diren jarduerak eta zerbitzuak antolatzea, honako arlo hauetan: lanbidea, prestakuntza, kultura, medikuntza, eta antzekoak, edo, hala bada-gokio, izaera horretako erakundee-kin lankidetzan aritzea, bai eta pro-

fesionalek beren jardueran hartutako erantzukizun zibilak estaltzeko ere.<sup>29</sup>

j) Elkargokideen interes profesio-nalen onerako diren beste hainbat funtzio eta zerbitzu garatzea.

## **22. artikulua. Erakundeen arbitrajea eta bitartekaritza.**

BAPEOk bitartekaritza bultzatu eta garatuko du, eta nazioko eta nazioarteko arbitraje-funtzioak bete-ko ditu, indarrean dagoen legerian ezarritakoaren arabera.<sup>30</sup>

## **2. ATALA.- ELKARGOAREN ZERBITZUAK**

### **23. artikulua. Kontsumitzaile eta erabiltzaileei eta elkargokideei arreta emateko zerbitzua.**<sup>31</sup>

1. BAPEOk kontsumitzaileen eta erabiltzaileen interesak babestuko ditu.

2. Horretarako, haiei arreta emateko zerbitzu bat izango du. Zerbitzu horrek nahitaez izapidetu eta ebatziko ditu elkargokideen elkargo-jarduerari edo jarduera profesionala-

---

<sup>26</sup> 18/1997 Legearen 24.j) artikulua eta LELren 5.b) artikulua

<sup>27</sup> 18/1997 Legearen 24.j) artikulua

<sup>28</sup> 18/1997 Legearen 24.m) artikulua

---

<sup>29</sup> LELren 5.j) artikulua eta 18/1997 Legearen 24.h) artikulua

<sup>30</sup> LELren 5.ñ) artikulua

<sup>31</sup> LELren 12. artikulua eta 18/1997 Legearen 50. artikulua

ri buruzko kexak eta erreklamazioak, elkargokideen zerbitzu profesionalak kontratatzen dituen edozein kontsumitzaile edo erabiltzailek aurkeztutakoak, bai eta kontsumitzaile eta erabiltzaileen elkarte eta erakundeek aurkeztutakoak ere, haien ordezkari gisa edo haien interesen alde.

3. Kexak eta erreklamazioak elektronikoki eta urrutitik aurkeztu ahal izango dira. Elkargoak kexa edo erreklamazioa dagokion moduan ebatziko du: bai gatazkak judizioz kanpo ebatzeko sistemari buruzko informazioa emanaz, bai espedienteak elkargoko organo eskudunei bidaliz, dagokion informazio- edo diziplina-espedienteak bideratzeko, bai artxibatuz edo beste edozein erabaki hartuz, dagokionaren arabera.

4. Era berean, elkargoak elkargokideek aurkeztutako kexa edo erreklamazioei erantzungo die.

## **24. artikulua. Leihatila bakarra.** <sup>32</sup>

1. BAPEOk webgune bat izango du, profesionalek, leihatila bakarraren bidez, elkargoko kide egiteko, jardunean aritzeko eta elkargoan baja emateko beharrezkoak diren

izapide guztiak egin ahal izan ditza- ten, puntu bakar batetik, bide elektronikoz eta urrutitik. Leihatila bakar horren bidez, profesionalek honako izapide hauek egin ahal izango dituzte, doan:

a) Lanbide-jardueran sartzeko eta jarduteko behar den informazioa eta formulario guztiak lortzea.

b) Beharrezko agiri eta eskabide guztiak aurkeztea, elkargoko kide izatekoa barne.

c) Interesduntzat jotzen diren prozeduren izapidetze-egoeraren berri izatea, eta nahitaezko izapide-egintzen jakinarazpena eta, horiei dagokienez, elkargoaren ebazpena jasotzea, diziplina-espedienteen jakinarazpena barne, hori ezinezkoa denean beste bide batzuetatik.

d) Ohiko eta ezohiko Batzorde Orokorretara deituak izatea eta elkargoaren jarduera publiko eta pribatua ezagutzea.

2. Aipatutako leihatila bakarraren bidez, kontsumitzaile eta erabiltzaileen eskubideak hobeto defendatzeko, elkargoak honako informazio hau emango du, argia, ageria eta doakoa izan beharko duena:

a) Elkargokideen erregistroan eta lanbide-sozietateen erregistroan sartzeko.

---

<sup>32</sup> LELren 10. artikulua eta 18/1997 Legearen 50,2. artikulua

b) Erreklamazio-bideak eta erre-kurtsoak, kontsumitzaile edo erabil-tzailearen eta elkargokide baten edo lanbide-elkargoaren arteko gatazka-rik izanez gero jar daitezkeenak.

c) Zerbitzu profesionalen hartzai-leek laguntza lortzera jo dezaketen kontsumitzaileen eta erabiltzaileen elkarte edo erakundeen datuak.

d) Kode deontologikoaren edukia.

3. Elkargoak beharrezko neurriak hartu beharko ditu artikulua honetan aurreikusitakoa betetzeko, eta, horretarako, behar diren teknologiak txertatu beharko ditu, eta plataforma teknologikoak sortu eta mantendu, sistemen arteko elkarreragingarritasuna eta desgaitasuna duten pertsonen irisgarritasuna bermatzeari begira.

### **3. ATALA.- JUSTIZIA ADMINISTRAZI-OAREKIN LANKIDETZAN ARITZEKO FUN-TZIOAK.**

#### **25. artikulua. Jakinarazpenak jasotzeko eta kopiak eta dokumentuak helarazteko zerbitzua.**

BAPEOk jakinarazpenak jasotzeko eta kopiak eta dokumentuak helarazteko zerbitzu bat prestatuko du, lege organikoetan eta prozesaletan xedatutakoaren arabera.<sup>33</sup>

---

<sup>33</sup> PZLren 28.3 eta 154. artikulua eta BJLOren 272. artikulua

#### **26. artikulua. Doako ordezkari-tza zerbitzua.**

1. BAPEOk doako ordezkari-tza zerbitzua antolatuko du doako laguntza juridikorako eskubidea aitortzetik eratorritako ordezkari-tza prozesaleko eskaerei erantzuteko.

2. Horretarako, txandak eta bitartekoak objektiboki eta ekitatez banatzeko sistemak ezarriko ditu. Horien bidez, profesionalak izendatuko dira, eta hala, zerbitzuak beti izango ditu behar bezala funtzionatzeko behar adina elkargokide. Sistema hori publikoa izango da prokuradore guzti-entzat, eta doako laguntza juridikoaren eskatzaileek kontsultatu ahal izango dute. Honako printzipio hauek arabera antolatuko da:

a) Elkargoaren lurraldea erregelamendu bidez zehazten diren eremu edo mugapeetan banatuko da, zerbitzua emate aldera.

b) Zerbitzuari atxikitzea aukerakoa izango da bi urte jarraian jardunean aritu diren elkargokideentzat, prokuradoreen kopuruak izendapenak betetzeko aukera ematen duen lurralde-eremuetan.

c) Gobernu Batzordeko kideek, hala eskatzen badute, beren agintaldian doako laguntza juridikoaren zerbitzua emateko betebeharretik salbuetsi ahal izango dira, karguari dagozkion betebeharrak betetzen

badituzte.<sup>34</sup>

3. Zerbitzuari atxikitako prokuradoreek zerbitzua emateko beharrezkoak diren gutxieneko prestakuntza eta espezializazio-baldintza orokorrak bete beharko dituzte, Doako Laguntza Juridikoaren urtarrilaren 10eko 1/1996 Legearen 25. artikuluan xedatutakoaren arabera.

### **27. artikulua. Ofiziozko txandako zerbitzua.**

1. BAPEOk ofiziozko txandako zerbitzu bat antolatuko du justizia-gaien ordezkaritza prozesala bermatzeko, Konstituzioaren 24. artikuluan agindutakoaren babesean eta lege prozesalean xedatutakoari jarraiki.

2. Elkargoak ofiziozko txandaren bidez izendatuko du prokuradorea, jurisdikzio-organoak agintzen duenean alderdia prokuradore batek ordezkari dezala, nahitaez esku hartu behar duen ala ez kontuan hartu gabe. Halaber, interesdunak eskatuta egingo du izendapena. Ordezkatuak prokuradorearen arantzel-eskubideak eta osagarriak ordaindu beharko ditu zerbitzu profesionalak emateagatik.

3. Aurreko manuan doako ordezkari-tza juridikoaren zerbitzurako ja-

sotako printzipio berberen arabera antolatuko da zerbitzua.

### **28. artikulua. Enbargatutako ondasunen gordailu-zerbitzua.**

BAPEOk enbargatutako ondasunen gordailu-zerbitzuak eratu eta antolatu ahal izango ditu, eta zerbitzu horiek gordailuzainarentzat legez ezarritako erantzukizunak bere gain hartzeko egokiak izan beharko dute.<sup>35</sup>

### **29. artikulua. Ondasunak diru bihurtzen espezializatutako erakundea izendatzea.**

BAPEO ondasunak diru bihurtzen espezializatutako erakunde gisa esleitu eta izendatu ahal izango da. Era berean, elkargoak enbargatutako ondasunak baloratzeko zerbitzu bat prestatu ahal izango du.<sup>36</sup>

## **4. ATALA.- LANBIDE HEZIKETA.**

### **30. artikulua. Lanbide-trebakuntzan parte hartzea.**

BAPEOk auzitegietako prokuradorearen lanbidean jarduteko gaitzen duen lanbide-titulua lortzera

---

<sup>34</sup> Doako Laguntza Juridikoaren urtarrilaren 10eko 1/1996 Legearen 24. artikulua garrantzitsua

---

<sup>35</sup> PZLren 626 artikulua

<sup>36</sup> PZLren 641.3 artikulua

bideratutako lanbide-trebakuntzako prozesuan parte hartuko du, urriaren 30eko 34/2004 Estatuko Legean eta hura garatzeko erregelamenduzko xedapenetan xedatutakoaren arabera.

### **31. artikulua. Tutoreen araubidea.**

Prokuradore-lanbidearen berezko jardueretan kanpoko praktiketako tutore-funtzioak bete nahi dituzten prokuradoreek bete behar dituzten baldintzak, bai eta horiek hautatzeko prozedura ere, Espainiako Auzitegi-etako Prokuradoreen Estatutu Orokorrean zehaztuko dira; estatutu horrek horien eskubideak eta bete-beharrak arautuko ditu.<sup>37</sup>

### **32. artikulua. Etengabeko prestakuntza.**

Elkargoak prokuradoreen etengabeko lanbide-prestakuntza sustatuko du, eta horri dagokion eginbeharraren eraginkortasuna zainduko du. Prokuradoreek maila egokia eta eguneratua izan behar dute beren lanbidean jarduteko eskatzen zaizkien ezagutzei dagokienez.<sup>38</sup>

---

<sup>37</sup> 34/2006 Legearen 6.2 artikulua.

<sup>38</sup> 18/1997 Legearen 24.g) artikulua

## **5. ATALA.- LANBIDEAN JARDUTEKO MODUAK ETA SOZIE-TATE-JARDUNAREN KONTROLA.**

### **33. artikulua. Lanbidean jarduteko moduak. Askatasuna eta mugak.**

1. Prokuradoreek lanbide bereko edo beste lanbide bateko beste profesional batzuekin jardun ahal izango dute, banaka edo taldean.

2. Banaka nahiz taldeka jardunez gero, sozietate gisa jardun ahal izango da. Sozietate moduan jarduteko, legeetan xedatutakoa bete beharko da.

3. Abokatutza eta auzitegi-etako prokuradoretzako zerbitzu profesionalak ematea helburu duten diziplina anitzeko sozietateek baino ezin izango dute defentsa- eta ordezkari-tza-zerbitzu juridiko integralik eman, lege-z aurreikusitako baldintzetan<sup>39</sup>.

### **34. artikulua. Prokuradoretzan aritzeko lanbide-sozietateak.**

1. Prokuradoretzako lanbide-jarduerak egiteko eratzen diren lanbide-sozietateak Lanbide-sozietateei buruzko martxoaren 15eko 2/2007 Legean xedatutakoaren arabera arautuko dira.

---

<sup>39</sup> Lanbide-sozietateei buruzko martxoaren 15eko 2/2007 Legearen 8. xedapen gehigarria (LSL).

2. Lanbide-sozietateak nahitaez inskribatuko dira beren egoitza soziala dagoen prokuradoreen elkargoko lanbide-sozietateen erregistroan. Erregistroan inskribatzeak berekin dakar erregistroan sartzea, bai eta lanbide-elkargoei buruzko legeriak elkargoan sartutako profesionalen gainean elkargoari ematen dizkion eskumenen mende egotea ere. <sup>40</sup>

3. Abokatutza eta auzitegietako prokuradoretzako zerbitzu profesionalak ematea helburu duten diziplina anitzeko sozietateak kasuan kasuko abokatuen eta prokuradoreen elkargoen lanbide-sozietateen erregistroetan inskribatuko dira, eta korporazio bakoitzaren eskumenen mende geratuko dira, kasuan kasuko lanbide-jardueraren arabera. <sup>41</sup>

## **II. KAPITULUA.- ANTOLAKETA.**

### **1. ATALA.- XEDAPEN OROKORRAK.**

#### **35. artikulua. Oinarrizko antolamendua.**

1. BAPEOren nahitaezko organoak dira:

a) Batzorde Orokorra.

---

<sup>40</sup> LSLren 8.4 artikulua

<sup>41</sup> LSLren 8.6 artikulua

b) Gobernu Batzordea.

c) Dekanoa.

2. Estatutu honen antolamendu-aurreikuspenak garatze aldera, Elkargoaren Barne Erregimeneko Araudiak beste elkargo-organo batzuk ere jaso ahal izango ditu. <sup>42</sup>

3. BAPEOko elkargo-organo guztiak aurrez aurre zein urrutitik deitu eta eratu ahalko dira, baita bilkurak egin, erabakiak hartu eta aktak bidali ere, Sektore Publikoaren Araubide Juridikoaren urriaren 1eko 40/2015 Legearen 17. artikuluan xedatutakoaren arabera, eta, hala badagokio, Barne Erregimeneko Araudian ezarritakoaren arabera. <sup>43</sup>

#### **36. artikulua. Lurralde-ordezkaritzak.**

Elkargoak lurralde-ordezkaritzak ezarri ahal izango ditu bere helburuak hobeto betetzeko eta elkargoaren funtzioak eraginkortasun handiagoz burutzeko. Gobernu Batzordeak eskuordetzen dizkien ahalmenak eta eskumenak izango dituzte ordezkaritzek.

---

<sup>42</sup> 18/1997 Legearen 34 artikulua.

<sup>43</sup> LELren 6. xedapen gehigarria

## **2. ATALA.- BATZORDE OROKORRA.**

### **37. artikulua. Batzorde Orokorra eta bere eskumenak.**

1. Batzorde Orokorra elkargoaren borondatea adierazteko organo gorenena da, eta elkargokide guztiek osatzen dute, beren eskubideak bete-betean erabiliz.<sup>44</sup>

2. Hauek dira Batzorde Orokorraren eskumenak:

a) Elkargoaren Estatutua, Barne Erregimeneko Araudia eta Kode Deontologikoa onartzea, bai eta horien aldaketak ere, hargatik eragotzi gabe Gobernu Batzordeak dagozkion garapen-araudiak erabakitzeke duen ahalmena.

b) Otsailaren 13ko 2/1974 Estatutuko Legearen 11. artikuluan aurreikusitako elkargoaren urteko memoriari arduratzea eta hori berrestea.

c) Elkargoaren aurrekontuak onartzea eta elkargoaren kontribuzioen zenbatekoa finkatzea.

d) Amaitutako ekitaldi bakoitzeko aurrekontuen eta gastu- eta sarrerakontuen likidazioa behin betiko onartzea.

e) Ondasun higiezin eta horien gainean eratutako eskubide errealek xedapen-egintzak baimentzea, bai

eta balio handikotzat inbentariatutako gainerako ondare-ondasunenak ere.

f) Dekanoa eta Gobernu Batzordeko kideak hautatzea, estatutu honetan zehaztutako prozedurari jarraiki.

g) Dekanoaren eta Gobernu Batzordearen kudeaketa kontrolatzea. Horretarako, txostenak eta, hala badagokio, dagozkion mozioak egingo ditu, baita zentsura-mozioa ere, estatutuetan ezarritako prozeduraren bidez.<sup>45</sup>

3. Gobernu Batzordeak aurkezten dizkion beste gai guztiez eta estatutu honetan aurreikusitako gainerakoez ere arduratu ahal izango da Batzorde Orokorra.

### **38. artikulua. Ohiko eta ezohiko Batzorde Orokorrak.**

1. Batzorde Orokorrak ohiko edo ezohiko bilkurak egin ditzake.

2. Urte natural bakoitzeko lehen eta azken hiruhilekoan, hurrenez hurren, Batzorde Orokorraren bilkurak egingo dira, eta ohikoak izango dira. Lehenengoan, nahitaez arduratuko dira aurreko artikuluko bigarren apartatuko b) eta d) letretan deskribatutako gaietaz, eta bigarrean,

---

<sup>44</sup> 18/1997 Legearen 35.1 eta 2 artikulua

---

<sup>45</sup> 18/1997 Legearen 35.3 artikulua.

berriz, artikulua eta apartatu bereko c) letran zerrendatutakoez.

3. Ezohiko bilkurak ere egin ahal izango dira, deialdiaren berezko gaiez arduratzeko, Gobernu Batzordeak hala erabakitzen duenean, bere ekimenez, dekanok eskatuta edo gutxienez elkargokideen ehuneko hogeik edo jarduneko elkargokideen ehuneko hamarrek idatziz eskatuta.<sup>46</sup>

### **39. artikulua. Elkargokideen proposamenak.**

Ohiko Batzorde Orokorra egin baino bost egun baliodun lehenago, elkargokideek eztabaidatu eta erabaki nahi dituzten proposamenak aurkeztu ahal izango dituzte. Gai-zerrendan sartuko dira, "proposamenak" izeneko atalean aztertzeko, "eskaerak eta galderak" deituriko azken atala baino lehen, baldin eta gutxienez elkargokideen ehuneko hogeik edo jarduneko elkargokideen ehuneko hamarrek izenpetuta aurkezten badira.

### **40. artikulua. Deialdia.**

1. Gobernu Batzordeak gutxienez hamabost egun lehenago deituko ditu Batzorde Orokorren bilkurak, eta presazko kasuetan, hamar egu-

nera murriztu ahal izango da, betiere behar bezala justifikatuta.

2. Elkargoaren web-orrian argitaratuko da deialdia, eta helbide elektronikora bidaliko zaie elkargokide guztiei, bitarteko telematikoen bidez.

3. Deialdian tokia, eguna eta ordua zehaztu beharko dira. Deialdian gai-zerrenda jasoko da, eta, behar izanez gero, eztabaidatuko diren gaiei buruzko dokumentazioa erantsiko da. Elkargokideek, nolana ere, gai-zerrendako gaiei buruzko informazioa eskuratzeko eskubidea baliatu ahal izango dute.

### **41. artikulua. Bilkurak egitea.**

1. Batzorde Orokorren bilkurak lehenengo deialdian edo, hala badagokio, bigarren deialdian adierazitako tokian, egunean eta orduan egingo dira. Lehenengo deialdian, jarduneko elkargokideen erdia gehi bat bertaratu beharko dira.

2. Bilkuretako buru elkargoko dekanoa izango da, edo, bestela, hura legez ordezkatzeko duena.

3. Bilkura hasi ondoren, aurreko bilkurako akta irakurri eta, hala badagokio, onartuko da, eta, ondoren, behin betiko gai-zerrendan bildutako gaiak eztabaidatuko dira.

4. Behin Batzorde Orokorra bilduta, ezin badira deialdiko gai guztiak

---

<sup>46</sup> 18/1997 Legearen 35.5 artikulua.

landu, denborarik ezagatik edo beste edozein arrazoiengatik, bertan behera utziko da eta zehaztutako egune(t)an jarraituko da, edo, bestela, Gobernu Batzordeak aukeratutako egune(t)an.

#### **42. artikulua. Eztabaidaren antolaketa.**

1. Lehendakariak zuzenduko du eztabaida, eta demokratikoki eman-  
go du hitz-txanda.

2. Ezin izango zaio eten hitz egiten ari denari, salbu eta lehendakariak ohartarazten badio, eztabaidagaitik at dagoen zerbaitetaz aritzegatik, edo lehendakariaren iritziz justifikatutako beste arrazoiaren bategatik.

3. Eztabaidagai beraren barruan hiru aldiz ohartarazi zaionari kendu egingo zaio hitza.

4. Elkargokideren bati hitza kendu ondoren ohartarazten jarraitzen bazaio, lehendakariak egokitzat jotzen dituen erabakiak hartu ahal izango ditu, batzordea bildu den lokaletik kanporatzea barne.

#### **43. artikulua. Erabakiak hartzea.**

1. Bozketak publikoak izango dira. Zentsura-mozio bat edo konfiantza-arazo bat eztabaidatzen denean izan ezik, isilpekoak izango baitira.

Isilpeko bozketa egiteko, boto-paperak utziko dira hautestontzian.

2. Oro har, emandako botoen gehien-  
goz hartuko dira erabakiak. Hala eta guztiz, zentsura-mozioari buruzko erabakiak hartzeko, edo elkargoa desegitekoak eta estatutuak aldatzekoak, estatutu hauetan bereziki aurreikusitako bertaratzeta bozketa-quorumak beharko dira.

3. Jarduneko botoak ez-jardunekoak baino bi aldiz balio handiagoa du.

4. Botoa pertsonalki eman beharko da.

5. Berdinketa gertatuz gero, dekanok edo haren legezko ordezkok boto erabakitzailea izango du.

6. Ezin izango da erabakirik hartu gai-zerrendan agertzen ez diren gaiei buruz.

#### **44. artikulua. Aktak onartzea.**

Batzorde Orokorrean hartutako erabakiak elkargoko idazkariak egingo duen aktan jasoko dira. Akta hori idazkariak berak eta dekanok baimenduko dute. Aktak foliodun edo behar bezala legeztatutako liburu batean transkribatuko dira, edo euskarri informatiko batean txertatuko dira. Akta Batzorde Orokorrean hurrengo bilkuran berretsi beharko da.

### **3. ATALA.- GOBERNU BATZORDEA.**

#### **45. artikulua. Gobernu Batzordea.**

1. Gobernu Batzordea elkargoaren administrazio- eta zuzendaritza-organoa da. <sup>47</sup>

2. Gobernu Batzordea honako hauek osatzen dute: dekanoa; dekanordea; idazkaria; idazkariordea; diruzaina eta lau kide

#### **46. artikulua. Eskumenak.**

Gobernu Batzordeak Batzorde Orokorrari erreserbatu ez zaizkion eskumenak erabiltzen ditu, baita beste elkargo-organo batzuei berriaz esleitu ez zaizkienak ere. Gainera, eta bereziki, honako hauek beteko ditu:

1. Elkargokideei eta elkargo-organoei dagokienez:

a) Elkargokidetzeko eskabideak ebaztea, bai eta elkargokide-izaera galtzea eta eteteari buruzkoak ere. Ahalmen hori kideetakoren bati eskuordetu ahal izango dio.

b) Lanbide-sozietateak elkargoko sozietateen erregistroan inskribatzea erabakitzea.

c) Ofiziozko txandako eta doako ordezkaritza juridikoko zerbitzuak

antolatzea eta kudeatzea, bai eta txandak banatzea doako justiziako auzilarien auzietan, edo onura hori izan gabe ofiziozko prokuradorea izendatzea eskatzen dutenen auzietan.

d) Lege prozesalek eta organikoek agintzen dizkieten edo Gobernu Batzordeak elkargoak hobeto funtzionatzeko eta bere funtzioak betetzeko sortu dituen jakinarazpen, idazki-lekualdatze, gordailu eta ondasunen diru-bihurtze zerbitzuak eta beste zerbitzu batzuk antolatzea eta kudeatzea.

e) Elkargoko lanbide-jarduera kontrolatzeko funtzioak betetzea.

f) Batzorde Orokorrari Elkargoaren Estatutua<sup>48</sup>, Barne Erregimeneko Araudia eta Kode Deontologikoa onartzea edo aldatzea proposatzea.

g) Elkargoaren urteko memoria egitea eta elkargoaren web-orriaren bidez horren berri ematea, Batzorde Orokorrak berretsi ondoren.

h) Gobernu Batzordeko kideak hautatzeko deialdia egitea, kapitulu honetan xedatutakoaren arabera.

i) Elkargoaren erabakien aurka jartzen diren errekurtsuez arduratzea, hala badagokio, IV. tituluko I. kapituluaren xedatutakoaren arabera.

---

<sup>47</sup> 18/1997 Legearen 36 artikulua.

---

<sup>48</sup> 18/1997 Legearen 36.3.a) artikulua

j) Diziplina-ahala baliatzea, IV. tituluko II. kapituluaren xedatutakoaren arabera.<sup>49</sup>

k) Lege- eta elkargo-araudia eta elkargoak hartutako erabakiak betetzen direla zaintzea, osoko bilkura-  
ren erabakiak gauzatuz.<sup>50</sup>

l) Elkargoaren jarduera eta antolaketa osoaren funtzionamendua koordinatzea.

m) Intrusismoa eta arau erregulatuak bete gabe lanbidean jardutea eragotzi eta jazartzea justizia-  
auzitegietan.

n) Profesionalen prestakuntza-, eguneratze- eta espezializazio-  
irakaskuntza antolatzea.

o) Elkargoaren argitalpenak eta sustapen-jarduerak zaintzea.

p) Elkargoko langileen plazak betetzeko deitzen diren lehiaketen oinarriak onartzea eta horiek kontratatzea.

q) Elkargokideen eta elkargokideen zerbitzu profesionalen erabiltzaileen kexak edo erreklamazioak ebaztea.

r) Elkargoko zerbitzu berriak ezarri eta antolatzea, daudenak zainduz, programatuz eta kontrolatuz.

---

<sup>49</sup> 18/1997 Legearen 36.1 eta 3.d) artikulua

<sup>50</sup> 18/1997 Legearen 36.1 artikulua.

2. Elkargoaren kanpo-jarduerari dagokionez:

a) Prokuradoreak defendatzea eta babestea, beren lanbide-funtzioak betetzerakoan bidegabeki artetatzen edo jazartzen dituztela uste denean.

b) Irizpenak, txostenak eta kontsultak egitea, organo judizialek, erakunde publiko edo pribatuek, erabiltzaileek edo kontsumitzaileek elkargoaren jarduketak behar dituztenean.

c) Elkargoaren izenean, prokuradoretzaren aurrerabideari eta interesei eta Justizia Administrazioaren funtzionamendu egokiari dagokionez komenigarri irizitako hobekuntzak egitea eta sustatzea.

d) Elkargoaren ordezkariak izendatzea auzitegietan, epaimahaietan eta batzordeetan, elkargoaren parte-hartzea eskatzen denean.

3. Elkargoaren ekonomia-  
arabideari dagokionez:

a) Elkargoa mantentzeko ezarritako elkargoaren kontribuzioen zenbatekoa biltzea, bai eta aurreikusitako gainerako baliabide ekonomikoen ere; elkargoaren ondarea administratzea.

b) Elkargoaren egitura ekonomikoa, aurrekontuak eta ondasunen inbentarioa zehaztea.

c) Aurrekontuen urteko proiektua prestatzea, Batzorde Orokorrak onar dezan <sup>51</sup>.

d) Aurrekontuaren eta sarrera-eta gastu-kontuen likidazioa ixtea eta Batzorde Orokorrari aurkeztea, onar ditzan <sup>52</sup>.

e) Elkargoaren kontribuzioen zenbatekoa eta ezohiko kuotak edo elkargoaren derramak ezartzea Batzorde Orokorrari proposatzea.

#### **47. artikulua. Funtzionamendu-araubidea.**

1. Gobernu Batzordea hilean behin bilduko da gutxienez, dekanok deialdia egin ondoren, bere ekimenez edo kideen ehuneko hogeik eskatuta <sup>53</sup>. Bilkurarako finkatutako eguna baino berrogeita zortzi ordu lehenago egingo da deialdia, kideak jakinaren ganean egon daitezen behar den aurrerapenarekin, salbu eta presazko arrazoiak deialdia epe laburragoan egitea justifikatzen badute.

2. Bilkura non, noiz eta zein ordu-tan egingo den jasoko da deialdian, baita gai-zerrenda ere.

3. Gobernu Batzordea balio osoz eratzeko, dekanoa, idazkaria edo

---

<sup>51</sup> 18/1997 Legearen 35.3.c) artikulua

<sup>52</sup> 18/1997 Legearen 35.3.c) artikulua

<sup>53</sup> 18/1997 Legearen 36.4 artikulua.

haren ordezkoa eta gutxienez kideen erdia bertaratu beharko dira.

4. Erabakiak botoen gehiengoz hartuko dira. Berdinketa gertatuz gero, dekanok kalitatezko botoa izango du.

5. Ezin izango da eztabaidatu edo erabaki gai-zerrendan agertzen ez den gairik, salbu eta kide guztiak bertaratu badira eta gehiengoaren aldeko botoaren bidez gaia premi-azkotzat jotzen badute.

#### **48. artikulua. Dekanoa.**

1. Dekanoak elkargoaren legezko ordezkaritza du; Gobernu Batzordeak hartutako erabakiak betearazten ditu; Batzorde Orokorrerako eta Gobernu Batzorderako deia egiten du eta horien buru da, eta, presazko kasuetan, bidezko neurriak edo erabakiak hartu, eta Gobernu Batzordeari helarazten dizkio, hark berretsi ditzan. <sup>54</sup>

2. Dekanoak, halaber, Gobernu Batzordea zuzendu eta koordinatzen du; elkargoaren gastuak eta inbertsioak baimentzen ditu, ordainketak egiteko aginduz; akta eta ziurtagiriei oniritzia ematen die; gainerako elkargo-organoen bileretako buru da bertaratzen denean, eta estatutu honek eta elkargoaren Bar-

---

<sup>54</sup> 18/1997 Legearen 37.1 artikulua.

ne Erregimeneko Araudiak esleitzen dizkion bestelako funtzio guztiak betetzen ditu.

#### **49. artikulua. Dekanordea, idazkaria, idazkariordea eta diruzaina.**

Dekanordeak, idazkariak, idazkariordeak eta diruzainak honako eskumen hauek izango dituzte, eta elkargoaren Barne Erregimeneko Araudian garatu ahal izango dira:

a) Dekanoa ez dagoenean, gai-xorik dagoenean edo kargua hutsik dagoenean, haren funtzio guztiak beteko ditu dekanordeak, eta dekanoa agindutako gai guztietan lagunduko dio.

b) Idazkariak elkargo-organoen egintzen eta erabakien fede ematen du; elkargo-organoen bileren gaitzerrenda prestatzen du, dekanoren jarraibideen arabera; aktak idatzi eta baimentzen ditu; ziurtagiriak egin eta baimentzen ditu; komunikazioak eta zirkularrak egiten ditu; elkargoaren liburuak eta dokumentazioa eraman eta zaintzen ditu; elkargokideen erregistroa eguneratzen du, eta administrazioko langileak zuzentzen ditu Gobernu Batzordearen jarraibideen arabera.

c) Idazkaria ez dagoenean, gai-xorik dagoenean edo kargua hutsik dagoenean, idazkariordeak haren lekua hartuko du, eta idazkariak

agindutako gai guztietan lagunduko dio.

d) Diruzainaren eskumena da: aurrekontuen eta urteko kontuen proiektua egitea; elkargoaren kontribuzioen proposamena egitea; Gobernu Batzordeari sarrera- eta gastu-kontuen egoeraren eta aurrekontuaren gauzatze-mailaren berri ematea; elkargoaren diru-bilketa eta kontabilitatea kontrolatzea; kontu korronteak ireki eta ixtea, eta dekanoarekin batera funtsak sartu eta ateratzea; elkargoaren ondasunen inbentarioa egitea, eta elkargoaren baliabideak kudeatzeko esleitzen zaizkion izaera ekonomikoko bestelako eskumen guztiak.

#### **50. artikulua. Kideak.**

Gobernu Batzordeko kide gisa egiten duten lanaz eta Gobernu Batzordeak esleitzen diezazkiekeen funtzioez gain, lehen, bigarren, hirugarren eta laugarren kideek, zenbakiaren hurrenkera korrelatiboaren arabera, dekanoa ordeztuko dute, dekanordea ez badago. Hala, bada, kasu eta ordena berean, diruzaina ordezkatuko dute, eta alderantziz, idazkaria, idazkariordea ez badago.

**4. ATALA.- KARGUAK BETETZEKO  
ARAUBIDEA.**

**51. artikulua. Hautapenezko izae-  
ra eta agintaldiaren iraupena.**

1. Gobernu Batzordeko karguak hautapenezkoak dira. Ohorezkoak eta ordainik gabekoak dira.

2. Gobernu Batzordeko kideak sufragio unibertsal, aske, zuzeneko eta sekretuaren bidez hautatuko dira.<sup>55</sup>

3. Lau urteko iraupena izango du, eta epe horren buruan kideen erdiak berrituko dira. Agintaldia amaitutakoan, kargu bererako edo beste baterako hautatu ahal izango dira berri.

**52. artikulua. Hautagarritasun-  
baldintzak.**

1. Gobernu Batzordeko edozein kargutarako hautagai izateko, ezinbesteko baldintza izango da lanbidean aritzea eta bost urtez jarraian aritu izana lanbidean jarduneko elkargokide gisa, dekanokarguaren kasuan izan ezik; izan ere, kargu horretan hamar urtez jarraian jardun beharko da jarduneko elkargokide gisa.

2. Gainera, ezingo dute egoera hauetakoren batean egon:

a) Kargu publikoetarako gaitasungabetzea edo etendura dakarren epai irmo baten bidez kondenatuak izana.

b) Prokuradoreen edozein elkargok diziplina-zehapena ezarri izana, zehapenak ezeztatu ez diren bitartean.

c) Elkargoaren kontribuzio-betebeharrak egunean ez izatea.

3. Elkargokide bat ere ezin izango da kargu batera baino gehiagotara aurkeztu deialdi berean hautagai gisa.

**53. artikulua. Kargugabetzeko  
arrazoiak.**

Gobernu Batzordeko kideek arrazoi hauengatik utziko dute kargua:

a) Uko egitea.

b) Kargua betetzeko estatutu-betekizunak hasieran ez betetzea edo gerora galtzea.

c) Hautatu zireneko agintaldia amaitzea.

d) Zentsura-mozioa onartzea, estatutu hauetan aurreikusitakoaren arabera.

---

<sup>55</sup> 18/1997 Legearen 36.2 artikulua.

#### **54. artikulua. Lanpostu hutsak betetzea.**

Agintaldia amaitzea ez den beste edozein arrazoiengatik Gobernu Batzordean hiru kideren karguak hutsik geratzen badira, Gobernu Batzordeko gainerako kideek beteko dituzte haien postuak, kapitulu honetan ezarritako ordezkapen-irizpideen arabera edo, bestela, Gobernu Batzordeak berak erabakitakoaren arabera.

#### **55. artikulua. Behin-behineko batzordea.**

1. Edozein arrazoiengatik Gobernu Batzordeko karguen erdiak baino gehiago hutsik geratzen badira, Euskal Autonomia Erkidegoko Prokuradoreen Kontseiluak edo, halakorik ezean, Espainiako Prokuradoreen Kontseilu Orokorrak behin-behineko batzorde bat izendatuko du. Antzinatean handiena duten jarduneko elkargokideek osatuko dute, eta eratu eta hurrengo hogeita hamar egunen barruan hauteskondeak deituko ditu batzordeak. Behin-behineko batzordeak, horrela eratu-ta, hautaketaren bidez izendatuek kargua hartu arte burutuko ditu haren funtzioak.

2. Izendatuak behartuta daude kargua onartzera, eta hori ukatzina

izango da, salbu eta gaixotasun larria denean arrazoi.

#### **5. ATALA.- KUDEAKETAREN ERANTZUKIZUNA.**

#### **56. artikulua. Zentsura-mozioa.**

1. Gobernu Batzordeari osoko bilkuran egindako zentsura-mozioa horretarako bakarrik deitutako ezohiko batzorde orokorrean gauzatu beharko da beti.

2. Ezohiko Batzorde Orokorrerako deialdia egiteko eskaera jarduneko elkargokideen heren batek izenpetu beharko du gutxienez, eta argi eta garbi adierazi beharko ditu deialdiaren arrazoiak.

3. Ezohiko Batzorde Orokorra eskaera aurkeztu eta hogeita hamar egun balioduneko epean egin beharko da. Deialdian zehaztutako gaiak bakarrik eztabaidatu ahal izango dira.

4. Ezohiko Batzorde Orokorra balio osoz eratzeko, elkargoan botoa emateko eskubidea duen errol-daren erdia baino gehiago bertaratu beharko da. Batzorde horretan botoa pertsonala, zuzena eta sekretua izango da beti.

5. Zentsura-mozioak aurrera egin dezan, bertaratutakoen bi herenen aldeko botoa beharko da.

6. Mozioa egin zenetik urtebete igaro arte, mozioaren sinatzaileek ezin izango dute zentsuramozioaren beste eskaerarik izenpetu.

### **57. artikulua. Konfiantza-arazoa**

Gobernu Batzordeak ezohiko Batzorde Orokorra deitu ahal izango du konfiantza-arazoa bakarrik planteatzeko bai bere programari buruz, bai kudeaketa-politikaren inguruko adierazpen jakin bati buruz. Batzorde Orokorrak balio osoz erabakitzen badu konfiantza ez ematea, kargu guztiak kargugabetuak izango direla ulertuko da, eta hauteskundeak deituko dira estatutu honetan xedatutakoaren arabera.

## **6. ATALA.- HAUTESKUNDE-ARAUBIDEA.**

### **58. artikulua. Botoa emateko eskubidea.**

Hauteskunde-prozesuaren deialdia egiten den egunean elkargoko eskubideak erabat erabiltzen ari diren elkargokide guztiak dira hautesle.

### **59. artikulua. Deialdia.**

1. Elkargoko Gobernu Batzordeak hauteskundeak deituko ditu kar-

guak betetzeko, hauteskundeak egin baino berrogei egun natural lehenago gutxienez.

2. Deialdiak honako alderdi hauek jaso beharko ditu: hautatu beharreko karguak; hauteskundeen eguna, ordua eta lekua, eta hauteskunde-egutegia.

3. Gobernu Batzordeak hauteskunde-prozesu bakoitzerako hauteskunde-arauak onartu ahal izango ditu, estatutu-aurreikuspen hauek garatuz. Kasu horretan, deialdiari erantsi beharko zaizkio.

### **60. artikulua. Hauteskunde Batzordea.**

1. Hauteskundeak deituta, Gobernu Batzordeak Hauteskunde Batzordea izendatuko du. Batzorde hori lehendakari batek, idazkari batek eta kide batek osatuko dute. Horiek hautatzeko, bost urte baino gehiagoko jardun profesionala duten jarduneko prokuradoreen arteko zozketa egingo da.

2. Hauteskunde-mahaiko kide izatea nahitaezkoa izango da izendatuentzat, eta Gobernu Batzordeak justifikatutako arrazoi larriengatik baino ezin izango dira salbuetsi.

3. Hauteskunde Batzordeak hauteskunde-prozesua zuzentzen duten estatutu- eta elkargo-arauak erres-

petatzen direla zainduko du, hauteskunde-prozesua bultzatu eta antolatzeke funtzioak betez, estatutu honetan esleitzen zaizkionak.

#### **61. artikulua. Hautesle-errola.**

1. Elkargoko idazkariak egingo du hautesle-errola, eta bertan agertuko dira hauteskundeetarako deia egiten den egunean botoa emateko eskubidea duten elkargokide guztiak.

2. Errola elkargoaren egoitzan egongo da ikusgai, hauteskundeetarako deialdia egiten denetik hamabost egun igaro ondoren. Lehenengo hamar egun naturalen barruan, erreklamazioak aurkeztu ahal izango dira barne hartu diren edo ez diren hautesleei buruz. Erreklamazioak Hauteskunde Batzordeak ebatziko ditu hurrengo bost egun naturalen barruan. Erroldan inskribatuta dauden elkargokideek bakarrik parte hartu ahal izango dute hauteskunde-prozesuan.

#### **62. artikulua. Hautagaiak aurkeztea eta izendatzea.**

1. Hautagaitzak elkargoko idazkaritzan aurkeztu beharko dira, hauteskunde-ekitaldirako ezarritako eguna baino hogeit hamar egun natural lehenago gutxienez, gutun-azal itxi

eta zigilatuan. Gutun-azal hori Hauteskunde Batzordearen zainzapean egongo da epea amaitu eta hurrengo egunera arte.

2. Hautagaitzak batera aurkeztu ahal izango dira hainbat kargutarako, edo banaka kargu jakin batzuetarako, eta hautagaiak berek bakarrik izenpetu beharko dituzte.

3. Hauteskunde Batzordeak hautagaitzak aurkezteko epea amaitu eta hurrengo egunerako deialdia egingo dio elkargoko idazkaritzan aldeztu aurretik izena eman duen ordezkari bakoitzari. Bertaratu diren guztien aurrean, gutun-azalak ireki eta akta egingo da. Ondoren, estatutuetako baldintzak betetzen dituzten hautagaiak izendatuko dira.

4. Hauteskunde Batzordeak erreklamazioak ebatziko ditu hurrengo bost egun naturalen barruan, eta ebazpena erreklamatzailaiei jakinaraziko die.

5. Hauteskunde Batzordeak hautagaiak izendatuko ditu, jarritako erreklamazioak ebatzita, eta elkargokideei izendapenen berri emango die, elkargoaren web-orriaren bidez eta elkargoaren egoitzako iragarkioetan jarrita. Hauteskunde Batzordeak boto-paperekin eredu ofiziala onartuko du; izendapenaren ondoren hasi beharko dira horiek prestatzen.

### **63. artikulua. Hautagai bakarrak hautetsi izendatzea.**

Kargu bakoitzerako hautagai bakarra aurkezten bada eta Hauteskunde Batzordeak izendatzen badu, Batzordeak, behar bezala eratuta, izendapena erabaki ahal izango du bozketa egin beharrik gabe.

### **64. artikulua. Hauteskunde kanpaina.**

1. Hautagaiak izendatu ondoren, hauteskunde kanpaina hasiko da eta hauteskundeak egiteko ordua baino berrogeita zortzi ordu lehenago bukatuko da.

2. Ezin izango da hauteskunde-propagandarik zabaldu, ezta hauteskunde-kanpainako egintzarik egin ere, behin kanpaina legez bukatuta, ezta hauteskundeetarako deialditik kanpainaren hasierara bitarteko al-dian ere.

### **65. artikulua. Bozketa motak. Posta bidezko botoa.**

1. Botoa pertsonalki edo postaz eman daiteke.

2. Postaz bozkatzeko, beharrezkoa da bidalketa jasota geratzea, boto-emailearen nortasuna egiazta-

tzea eta botoaren isilpekotasuna bermatzea.

3. Postaz bozkatzeko prozedurak baldintza hauek bete beharko ditu:

a) Botoa boto-paper ofizial batean sartuko da. Gutun-azal batean sartu, itxi eta, era berean, gutun-azal handiago batean sartuko da. Gutun-azal horretan hauteslearen nortasun-agiriaren fotokopia erantsiko da, eta hark sinatuko du.

b) Prokuradoreen Elkargoaren egoitzara bidaliko da, eta, bertan, honako hau adieraziko dira: "Hauteskunde Batzorderako". Elkargoak bidalketa horien sarrera erregistratuko du eta gutun-azala ireki gabe Hauteskunde Batzordeari emango zaio bozketa egunean.

4. Hauteskundeak egin aurreko eguna izango da botoa postaz emateko azken eguna.

5. Hautesle guztiek postaz emandako botoa bertan behera utz dezakete, botoa pertsonalki ematera agertuta. Kasu horretan, gutun-azala orduantxe eta haren aurrean suntsituko da.

### **66. artikulua. Zenbaketa, emaitzen aldarrikapena eta erreklamazioak.**

1. Bozketa bukatutakoan, Hauteskunde Batzordeak botoak zenbatuko ditu berehala. Boto gehien lor-

tzen dituzten hautagaiak izendatuko dira kargu bakoitzerako. Berdinketa izanez gero, elkargoan bertan denbora gehien daramana hautatuko da eta, berdinketak bere horretan irauten badu, adinari dagokionez zaharrena.

2. Bozketa hasi baino hogeita lau ordu lehenago, hautagaiek mahaiko kontu-hartzaile bat izendatu dutela jakinarazi ahalko diote Hauteskunde Batzordeari. Kontu-hartzaileak bozketa eta boto-kontakteta prozesu osora joan ahal izango dira, eta bi-dezkatat jotzen dituzten erreklamazioak egin. Erreklamazioak hark ebartziko ditu eta idazkariak aktan jasoko ditu. Kontu-hartzaileek eta hautagaiek boto-paperak aztertu ahalko dituzte zenbaketa bukatutakoan.

3. Zenbaketa bukatutakoan, emaitzaren akta egingo da eta Hauteskunde Batzordeko lehendakariak aretoan daudenei jakinaraziko die. Hauteskunde Batzordeak hautetsiak izendatuko ditu eta emaitzak argitaratuko ditu, behar den akta eginez.

4. Hauteskundeen emaitzen aurkako erreklamazioak Euskal Autonomia Erkidegoko Prokuradoreen Kontseiluan aurkeztuko dira, hauteskundeak egin eta gehienez ere hilabeteko epean.

5. Estatutu honetan hauteskunde-prozedurari buruz aurreikusi ez denerako, Hauteskunde Araubide Orokorraren ekainaren 19ko 5/1985 Lege Organikoan xedatutako printzipioak aplikatuko dira, osagarri gisa.

## **67. artikulua. Karguaz jabetzea.**

1. Hautetsi berriek bost eguneko epea izango dute karguaz jabetzeko, beren hautaketa aldarrikatu eta hurrengo egunetik aurrera.

2. Hurrengo hamar egunetan, dekanok kargu berrietaz jabetu direla jakinaraziko die Prokuradoreen Kontseilu Orokorrari, Euskal Autonomia Erkidegoko Prokuradoreen Kontseiluari eta lanbide-elkargoen arloan eskumena duen Eusko Jaur-laritzako sailari.

## IV. TITULUA.- ARAUBIDE JURIDIKOA

### I. KAPITULUA- ARAUBIDE JURIDIKO OROKORRA.

#### 68. artikulua. Aplikatu beharreko araudia

1. Honako arau hauek arautzen dute BAPEO:

a) Estatuko 2/1974 Legea, otsailaren 13koa, Lanbide Elkargoei buruzkoa, eta Euskal Autonomia Erkidegoko 18/1997 Legea, azaroaren 21ekoa, Tituludun Lanbideei eta Profesionalen Elkargo eta Kontseiluei buruzkoa.

b) Estatutu hau.

c) Barne Erregimeneko Araudia eta Estatutua garatzeko eta aplikatzeko onartzen diren gainerako arauak.

d) Gainerako ordenamendu juridikoa, aplikatzekoa zaion heinean.

2. Elkargoa, zuzenbide publikoko korporazioa den aldetik, administrazio-zuzenbidearen mende dago <sup>56</sup>. Administrazio Zuzenbideari lotutako jarduketetan, Administrazio Publikoen Administrazio Prozedura Erkide-

---

<sup>56</sup> 18/1997 Legearen 48.1 artikulua.

aren urriaren 1eko 39/2015 Legea aplikatuko da, 2.4 artikuluan aurreikusitako moduan.

3. Gai zibil edo penalak dagokien araubide juridikoaren mende gertatzen dira, bai eta langileekiko harremanak ere, lan-legeriaren arabera arautuko baitira. Era berean, ondarea, kontratazioa eta lanbide-elkargoen ogasunaren berezko gaiei dagokien beste edozein alderdi zuzenbide pribatuaren arabera arautuko dira. <sup>57</sup>

4. Elkargoaren akordio, erabaki edo gomendioek Lehia Defendatzeko Legearen mugak bete beharko dituzte. <sup>58</sup>

5. Merkataritza-komunikazioei dagokienez, Publizitateari buruzko Lege Orokorrean eta Lehia Desleialari buruzko Legean xedatutakoa beteko da.

#### 69. artikulua. Egintzen eraginkortasuna.

1. Elkargoak administrazio-ahalak erabiliz hartzen dituen erabakiak betearazletzat joko dira hartzen di-

---

<sup>57</sup> 18/1997 Legearen 48.1 eta 2 artikulua

<sup>58</sup> LELren 2.4 artikulua.

renetik, eta, hala dagokionean, jakinarazi edo argitaratu baino ez dira egin beharko, salbu eta erabaki horiek hartzeko epea edo eraginkortasun-baldintza bete behar badute.

2. Elkargoak ez badu gaitasunik eta baliabiderik bere administrazio-egintzak nahitaez betearazteko, Euskal Autonomia Erkidegoko Administrazioari jakinaraziko dio, Atxikipen Sailaren bidez. Horretarako, administrazio-egintzen nahitaezko betearazpenerako beharrezkoa den laguntza exekutiboa eskatu ahal izango dio.

3. Zehapen-ebazpenak Estatutuaren IV. tituluko II. kapituluan xedatutakoaren arabera gauzatuko dira, Tituludun Lanbideei eta Profesionalei Elkargo eta Kontseiluei buruzko azaroaren 21eko 18/1997 Legearen 20. artikuluan ezarritakoaren arabera.

## **70. artikulua. Aurkaratzeko araubide orokorra.**

1. Errekurtsoa aurkeztu ahal izango da elkargo-organoen erabaki eta ebazpenen aurka, bai eta gaiaren funtsa zuzenean edo zeharka erabakitzen duten izapide-egintzen aurka ere, prozedurarekin jarraitzea eragozten badute, defentsa-gabezia sortzen badute edo bidezko eskubi-

de eta interesei kalte konponezina eragiten badiete. Honela:

a) Gobernu Batzordearen eta Batzorde Orokorraren erabakien aurka gora jotzeko errekurtsoa aurkeztu ahal izango da Euskal Autonomia Erkidegoko Prokuradoreen Kontseiluan.<sup>59</sup>

b) Gainerako elkargo-organoen erabakien aurka errekurtsoa aurkeztu ahal izango da, hala badagokio, Gobernu Batzordean.

2. Elkargoan errekurtsoak jartzea, horien epeak eta horien ebazpena Administrazio Publikoen Administrazio Prozedura Erkidearen legerian xedatutakoaren arabera arautuko dira, hurrengo manuan xedatzen diren berezitasunei kalterik egin gabe.

3. Euskal Autonomia Erkidegoko Administrazio Publikoek eskuordetutako ahalmen edo eskumenak erabiliz hartutako erabakiak horien egintzak aurkaratzeko araubide orokorraren mende egongo dira.<sup>60</sup>

## **71. artikulua. Errekurtso-prozeduraren berezitasunak.**

1. Euskal Autonomia Erkidegoko Prokuradoreen Kontseiluaren ardurako errekurtsoak Elkargoaren Go-

---

<sup>59</sup> 18/1997 Legearen 42.1.d) artikulua

<sup>60</sup> 18/1997 Legearen 49.3 artikulua.

bernu Batzordean aurkeztuko dira, eta Gobernu Batzordeak, bere aurrekariekin eta dagokion txostenarekin batera, kontseiluari aurkeztu beharko dizkio, aurkezten diren egunetik hamabost eguneko epean.

2. Euskal Autonomia Erkidegoko Prokuradoreen Kontseiluak gehienez ere hiru hilabeteko epean ebatzi eta jakinarazi beharko du, errekurtsioa jarri eta hurrengo egunetik zenbatzen hasita. Isiltasunak ezesten-ondoreak izango ditu. Errekurtsogileak errekurritutako erabakia bertan behera uzteko eskatu ahal izango du, eta Euskal Autonomia Erkidegoko Prokuradoreen Kontseiluak erabaki edo ukatu, arrazoiak emanaz.

3. Gobernu Batzordeak Batzorde Orokorraren erabakien aurkako errekurtsioak aurkezteko legitimitatea izango du beti.

## **72. artikulua. Jurisdikzio-berrikuspena.**

BAPEOren Batzorde Orokorrak eta Gobernu Batzordeak emandako egintzak, administrazio-zuzenbideari lotuta daudenean, korporazio-errekurtsioak agortu ondoren, zuzenean errekurritu ahal izango dira

administrazioarekiko auzien jurisdikzioan.<sup>61</sup>

## **II. KAPITULUA.- DIZIPLINA-ARAUBIDEA.**

### **1. ATALA.- XEDAPEN OROKORRAK.**

#### **73. artikulua. Diziiplina-ahala.**

1. BAPEOko profesionalek beren jardunaren bide-erakusle izan behar dute komunitateari zerbitzua ematea eta lanbideari dagozkion betebeharrak deontologikoak betetzea.

2. BAPEOk diziplinazko zehapena ezarriko die profesionalen eta, hala badagokio, lanbide-sozietateen ekintza eta ez-egiteei, baldin eta lanbidea, Estatutua eta elkargoaren erregelamenduak edo Kode Deontologikoa urratzen badituzte.

3. Arau-haustea oso astunak, astunak edo arinak izango dira.<sup>62</sup>

#### **74. artikulua. Eskumena.**

1. Diziiplina-ahala baliatzea Elkargoko Gobernu Batzordearen ohiko eskumena da.<sup>63</sup>

---

<sup>61</sup> 18/1997 Legearen 49.1. artikulua eta LELren 8.1 artikulua.

<sup>62</sup> 18/1997 Legearen 14.2 artikulua.

2. Euskal Autonomia Erkidegoko Prokuradoreen Kontseiluak du BA-PEOko Gobernu Batzordeko kideen gainean diziplina-ahalmena baliatzeke eskumena.<sup>64</sup>

## 2. ATALA.- ARAU-HAUSTEAK.

### 75. artikulua. Arau-hauste oso astunak.

Honako hauek dira arau-hauste oso astunak:

1. Azaroaren 21eko 18/1997 Legearen 15. artikuluko 1. apartatuko a), b), c), d), e) eta g) letretan halakotzat tipifikatutakoak, honela zehaztuta:

a) Prokuradore lanbidean aritzea, auzitegi-tako prokuradore lanbiderako gaitzen duen lanbide-titulua izan gabe, Estatuaren urriaren 30eko 34/2006 Legean xedatutakoaren arabera.

b) Prokuradorearen betebeharrak ez betetzea, jarduera profesionala eskatzen edo hitzartzen dutenentzat kalte larria dakarrenean.

c) Lanbide-sekretua urratzea.

d) Prokuradorearen lanbidean aritzea, lanbidean gaitasungabetuta edo bateraezintasun- edo debekausaren batean sartuta egonda.

e) Prokuradorearen lanbidean aritzearen ondorioz dolozko delituak egitea, edozein partaidetza-mailatan.

f) Bi urteko epean gutxienez bi arau-hauste astun egitea. Apartatu honetan xedatutakotik salbuetsita dago hurrengo manuko 1. apartatuko h) letretan jasotako arau-haustea.

2. Jarraian tipifikatzen direnak, aurreko arau-hausteen motaren zehaztapena diren aldetik, prokuradorearen lanbidearen berezko ezaugarri dagozkielako, baita elkargokideei dagokienez ere, azaroaren 21eko 18/1997 Legearen 15.1.f) artikuluan xedatutakoaren arabera:

a) Doako ordezkari-tza-zerbitzua ematean eskubide ekonomikoak bidegabe jasotzea.

b) Fakturak edo minutak jaulkitzea existitzen ez diren kontzeptu-engatik edo egin gabeko jarduketa profesionalengatik.

c) Jurisdikzio-organoetara edo idazkiak jakinarazi eta helarazteko zerbitzu erkideetara behin eta berriz ez joatea, justifikaziorik gabe.<sup>65</sup>

---

<sup>63</sup> 18/1997 Legearen 19.3.b) eta 36.3.d) artikulua

<sup>64</sup> 18/1997 Legearen 19.3.a) artikulua

---

<sup>65</sup> 18/1997 Legearen 15.1 artikulua.

3. Zerbitzu profesionalak eskaintzeko debekua urratzea, Delituaren Biktimaren Estatutuaren apirilaren 27ko 4/2015 Estatuko Legearen 8. artikuluan aurreikusitako baldintzetan.<sup>66</sup>

## **76. artikulua. Arau-hauste astunak.**

Honako hauek dira arau-hauste astunak:

1. Azaroaren 21eko 18/1997 Legearen 15. artikuluko 2. apartatuko b), c), d), e), f), g), h) eta j) letretan halakotzat tipifikatutakoak, honela zehaztuta:

a) Prokuradorearen betebeharrak ez betetzea, jarduera profesionala eskatzen edo hitzartzen dutenentzat kaltea dakarrenean.

b) Azaroaren 21eko 18/1997 Legearen 11. artikuluan xedatutakoaren arabera, elkargoari intrusismo-egintza edo bestelako lanbide-jarduera irregularren berri emateko betebeharrak urratzea.

c) Azaroaren 21eko 18/1997 Legearen 12. artikuluan ezarritako aseguratzearen betebeharrak ez betetzea.

d) Azaroaren 21eko 18/1997 Legearen 13. artikuluan aipatzen den nahitaezko jardun profesionalaren betebeharrak ez betetzea, salbu eta zerbitzua ematea eragozten duen arrazoi justifikatua badago, horretarako errekerimendua egin zaionean.

e) Lanbide bereko beste profesional batzuen edo lanbideko gobernu-organoen duintasuna larriki iraintzea, bai eta lanbide-jarduna dela eta haiekin harremanak dituzten pertsona edo erakundeena ere, eta horiei fisikoki erasotzea.

f) Lehia desleiala dakarten egintzak, lehiaren zuzenbidearen eta lehia desleialaren arloan indarrean dagoen legediaren arabera.

g) Elkargoaren edo haren organoen ohiko funtzionamendua eragozten edo aldatzen duten egintzak.

h) Bi urteko epean gutxienez bost arau-hauste arin egitea.

2. Jarraian tipifikatzen direnak, aurreko arau-hausteen motaren zehaztapena diren aldetik, prokuradorearen lanbidearen berezko ezaugarriei dagozkielako, baita elkargokideei dagokienez ere, azaroaren 21eko 18/1997 Legearen 15.2.i) artikuluan xedatutakoaren arabera.

a) Kode Deontologikoan jasotako betebeharrak ez betetzea, arau-hauste oso astun edo arin gisa tipifikatzen denean izan ezik.

---

<sup>66</sup> Delituaren Biktimaren Estatutuaren apirilaren 27koa 4/2015 Legearen 8.2 artikulua

b) Estatutu honetako 18. artikuluan deskribatutako elkargokideen betebeharrak ez betetzea, arau-hauste oso astun edo arin gisa tipifikatzen denean izan ezik.

c) Elkargoko karguetan arreta, ardura edo fideltasunik ez izatea, edo karguari dagozkion betebeharrak ez betetzea.

d) Elkargo-organo eskudunen errekerimenduak ez betetzea edo ez aintzat hartzea.

e) Azaroaren 23ko 17/2009 Estatuko Legearen 22.2 artikuluan eskatutako informazioa zerbitzu profesionalaren hartzaileen esku jartzeko betebeharra ez betetzea.<sup>67</sup>

### **77. artikulua. Arau-hauste arinak.**

Arau-hauste arinak dira azaroaren 21eko 18/1997 Legearen 15.3 artikuluan halakotzat tipifikatutakoak, eta honela zehazten dira:

a) Lanbide-jarduera arautzen duen beste edozein manu urratzea, betiere arau-hauste astuna edo oso astuna ez bada.

b) Elkargokideak aintzat ez hartzea.

c) Begirunerik ez izatea elkargoko gobernu-karguei, betiere ez denean iraingarria.<sup>68</sup>

## **3. ATALA.- ZEHAPENAK.**

### **78. artikulua. Zehapen motak.**

1. Diziplina-zehapen hauek ezarri ahal izango dira:

1. Ohartarazpena.

2. Gehienez 300 €-ko isuna.

3. Lanbide-gaitasungabetzea, urtebeterako gehienez.

4. 301 eta 3.000 € bitarteko isuna.

5. 3.001 eta 30.000 € bitarteko isuna.

6. Lanbide-gaitasungabetzea, urtebete gehi egun bat eta hogeitun urte artekoa.<sup>69</sup>

2. Gainera, 3.etik 6.era arteko zehapenek hauteskunde-eskubideak etetea ere badakarte zehapenaren aldi bererako, bai eta, hala badagokio, elkargoko karguak uztea ere.

3. Arau-hausteak lanbide-sozietate batek egiten dituenean, elkargokideei aplikatuko zaizkien zehapen berberak aplikatuko zaizkie, berezi-

---

<sup>67</sup> 18/1997 Legearen 15.2 artikulua.

<sup>68</sup> 18/1997 Legearen 15.3 artikulua.

<sup>69</sup> 18/1997 Legearen 16. artikuluko 1. apartatutik 3.era.

tasun hauekin:

a) 3. eta 6. zehapenekin batera, sozietateari baja emango zaio lanbide-sozietateen erregistroan, zehapenaren aldi bererako.

b) Ez da aplikatuko manu honen bigarren apartatuan deskribatutako zehapen osagarria.

### **79. artikulua. Arau-hausteen eta zehapenen arteko elkarrekotasuna.**

1. Arau-hauste arinei aurreko artikuluko lehenengo apartatuan jasotako 1. eta 2. zehapenak egokituko zaizkie, astunei 3. eta 4. zehapenak, eta oso astunei, berriz, 5. eta 6. zehapenak.<sup>70</sup>

2. Zehapenak aplikatzean, kasuan kasuko inguruabarrak hartuko dira kontuan, eta, bereziki, honako hauek:<sup>71</sup>

a) Jokabidearen ageriko intentzionalitatea.

b) Lanbide-zabarkeria barkaezina.

c) Elkargoaren erabakiei edo errekerimenduei behin eta berriz men ez egitea.

d) Hirugarrenei kalte edo galera larria eragitea.

e) Kargu publikoan edo elkargoko kargu batean aritzea arau-haustea egitean, izaera horretaz baliatuz.

3. Arau-hausleak onura ekonomikoak lortu badu arau-haustearen ondorioz, isunari aurreko artikuluan aurreikusitako gehieneko mugen etekin ekonomikoaren ebaluazioa gainditzen duen zenbatekoa gehituko zaio, alegia, gutxienez ebaluazio horren baliokidea eta gehienez bi-koitza.<sup>72</sup>

### **80. artikulua. Zehapenen eraginkortasuna eta betearazpena.**

1. Elkargoak ezarritako zehapenek Espainiako lurralde osoan izango dituzte ondorioak, otsailaren 13ko 2/1974 Estatuko Legearen 3.3 artikuluan xedatutakoaren arabera.

2. Zehapenak ezin izango dira betearazi ebazpenak administrazio-bidea amaitu arte.<sup>73</sup>

3. Elkargoak berak nahitaez betearaziko ditu bere zehapenebazpenak, Euskal Autonomia Erkidegoko Administrazioari aplikagarri zaizkion arauen arabera. Euskal Autonomia Erkidegoko Administrazioak modu subsidiarioan betearaziko ditu lanbide-gaitasungabetzeko zehapenak ezartzen dituzten elkar-

---

<sup>70</sup> 18/1997 Legearen 16.1, 2 eta 3 artikulua

<sup>71</sup> 18/1997 Legearen 16.5 artikulua.

---

<sup>72</sup> 18/1997 Legearen 16.4 artikulua.

<sup>73</sup> 18/1997 Legearen 20.3 artikulua.

goaren ebazpenak.<sup>74</sup>

3. Zehapen-ebazpena irmo bihurtzen den unetik aurrera izango da eraginkorra gaitasungabetze-zehapena. Zehatua jada gaitasungabetze-egoeran badago beste arrazoi batzuentatik edo beste zehapen batzuk betearaztearen ondorioz, gaitasungabetze-aldia automatikoki betetzen hasiko da aurrekoa azkentzen den unean, eta horrela hurrenez hurren.<sup>75</sup>

4. Zehapen guztiak interesdunaren elkargo-espeditentean jasoko dira, eta Kontseilu Orokorrari, Euskal Autonomia Erkidegoko Prokuradoreen Kontseiluari eta, hala badagokio, kide den elkargoari jakinaraziko zaizkie

#### **4. ATALA.- PRESKRIPZIOA ETA EZE- REZTEA.**

### **81. artikulua. Arau-hausteen eta zehapenen preskripzioa.<sup>76</sup>**

1. Arau-hauste arinak urtebetera preskribatuko dira, astunak bi urtera eta oso astunak hiru urtera.

2. Arau-hauste arinengatik ezarritako zehapenak urtebetera preskri-

batuko dira, arau-hauste astunengatik ezarritakoak bi urtera, eta arau-hauste oso astunengatik ezarritakoak hiru urtera.

3. Arau-hausteen preskripzioepeak arau-haustea egin den egunetik hasiko dira zenbatzen, eta zehapenenak, aldiz, zehapen-ebazpena irmo bihurtu eta biharar-munetik.

4. Arau-hausteen preskripzioa eten egingo da zehapen-prozedura hasten denean, interesduna jakinaren gainean dagoela. Zehapen-espeditentea sei hilabetez baino gehiagoz geldirik badago espeditentean dagoen pertsonari egotzi ezin zaion arrazoiren batengatik, preskripzioa zenbatzen hasiko da berriro.

5. Zehapenen preskripzioa eten egingo da betearazpen-prozedura hasten denean, interesduna jakinaren gainean dagoela, eta epea berriro igaroko da, prozedura sei hilabete baino gehiagoz geldirik badago arau-hausleari egotzi ezin zaion arrazoiren batengatik.

### **82. artikulua. Zehapenak ezereztea.**

1. Zehapenak urtebetera ezereztatuko dira, ezarritako zehapena 1. edo 2. zehapena bada; bi urtera, 3. edo 4. zehapena bada; hiru urtera,

---

<sup>74</sup> 18/1997 Legearen 20.1 eta 2 artikulua

<sup>75</sup> 18/1997 Legearen 17.4 artikulua.

<sup>76</sup> 18/1997 Legearen 18 artikulua.

5. zehapena bada; eta bost urtera,  
6. zehapena. Aurreko epeak zehapena benetan betetzen denetik aurrera zenbatuko dira.

2. Ezerezteak aurrekari zehatzak deuseztatzea dakar ondorio guztietarako.

## **5. ATALA.- DIZIPLINA-PROZEDURA.**

### **83. artikulua. Prozeduraren araubide juridikoa.**

1. Diziplina-ahala baliatzeko, dagokion diziplina-prozedura hasi behar da.

2. Diziplina-prozeduraren izapideak atal honetan eta Euskal Autonomia Erkidegoko Herri Administrazioen zigortzeko ahalmenari buruzko otsailaren 20ko 2/1998 Legean aurreikusten ez den guztian xedatutakoaren arabera egingo dira.

### **84. artikulua. Aurretiazko jarduketak.**

1. Prozedura hasi aurretik, Gobernu Batzordeak aurretiazko jarduketak egin ahal izango ditu, alde aurretik zehazteko ea prozedura hastea justifikatzen duten inguruabarrak dauden.

2. Jarduketa horiek, bereziki, honako hauek zehaztera bideratuko

dira, ahalik eta modu zehatzenean: prozedura hasia eragin dezaketen egitateak, erantzulea izan daitekeen prokuradorearen identifikazioa eta zenbait alderditan eragina izan dezaketen inguruabar garrantzitsuak.

3. Izapide horren hasiera salatuari jakinaraziko zaio, eta, hala badagokio, aurkeztutako kexa edo salaketa helaraziko zaio, hamar eguneko epean erantzun eta egoki irizitako alegazioak egin ditzan.

4. Gobernu Batzordeak egoki irizitako ikerketa-eginbide guztiak egitea erabaki ahal izango du.

5. Aurretiazko jarduketak amaitu ondoren eta, nolana ere, erabakia hartu eta gehienez ere sei hilabete epea igaro ondoren, Gobernu Batzordeak diziplina-prozedura artxibatze edo hasteko aginduko du, erabaki horren ondorioz. Interesdunei jakinarazi behar zaie, eta, hala badagokio, horren aurka zer errekurso jar daitezkeen adieraziko zaie.

### **85. artikulua. Diziplina-prozedura.**

1. Diziplina-prozedura ofizioz hasiko du Gobernu Batzordeak, bere ekimenez, dekanoren eskaera arrazoituaren ondorioz edo elkargokide batek edo bidezko interesa duen hirugarren batek sinatutako salaketaren ondorioz. Salaketak honako

hauek jaso beharko ditu: salatzailearen identifikazioa, arau-haustea eragin dezaketen gertaeren azalpena eta data, eta, ahal denean, ustezko erantzulearen identifikazioa.

2. Diziplina-prozedura hasteko erabakiak honako hauek jaso beharko ditu: ustezko erantzule den profesionalaren edo profesionalen identifikazioa, espedientea irekitzea eragin duten egitateak laburki azalduta, instrukziotik ondorioztatzen denari kalterik egin gabe, bai eta prozeduraren instruktorea eta, hala badagokio, idazkaria izendatzea ere, horiek errefusatzeko araubidea adierazita, eta prozeduran alegazioak egiteko eta entzunaldia emateko eskubidea eta horiek gauzatzeko epeak. Erabakia interesdunari jakinaraziko zaie.

3. Beharrezko ikerketa-eginbideak egin ondoren, instruktoreak espedientea largestea proposatuko du, baldin eta diziplinari dagokionez legez kontrako zantzurik aurkitzen ez badu; bestela, kargu-orria egingo du. Espedientea largestea xedatzen duen Gobernu Batzordearen ebazpena berehala jakinaraziko zaie interesdunari.

4. Kargu-orrian zehatz-mehatz, argi eta behar bezala arrazoituta adieraziko dira legez kontrakotzat jotzen diren lanbide- edo elkargo-egintzak, jokabide horren arau-

hauste motaren kalifikazioa eta, hala badagokio, ezarri daitekeen zehapena.

5. Interesdunari hamabost egun balioduneko epea emango zaio idatziz erantzuteko, alegazio-idazkia egiteko, agiriak eta informazioa aurkezteko eta bere defentsarako egokitzat jotzen dituen frogak proposatzeko. Zuzenbidean onargarriak diren frogabide guztiak erabili ahal izango dira. Instruktoreak egokitzat jotzen dituenak aztertuko ditu proposamenen artean edo ebatzi ditzakeenak. Egindako entzunaldiak eta aztertutako frogak idatziz jasoko dira espedientean.

6. Instrukzioa amaitzeko, ebazpen-proposamen bat egingo da. Proposamen horrek zehatz-mehatz finkatuko ditu espedientepean dagoen pertsonari egotzitako egitateak, egindako arau-haustea edo arau-haustea adieraziko ditu, bai eta dagozkion zehapenak ere. Proposamen horren berri emango zaio interesdunari, eta beste entzunaldi-izapide bat emango zaio, bere eskubideen alde egokitzat jotzen duen guztia alegatu ahal izan dezan.

7. Gobernu Batzordeak, arrazoiak emanez, egokitzat jotzen duen ebazpena hartuko du, eta planteatutako gai guztiak erabakiko ditu. Ezingo du izan ebazpen-proposamenaren oinarri izan ez zi-

ren bestelako egitateei buruzkoa. Instruktoarea Gobernu Batzordeko kide bada, ezin izango du eztabaidetan parte hartu, ezta diziiplina-prozedura amaitzen duen ebazpe-nean ere.

### **III. KAPITULUA.- SARIEN, PRO-TOKOLOAREN ETA SINBOLOEN ARAUBIDEA.**

#### **86. artikulua. Elkargokideak eta ohorezko karguak.**

1. Gobernu Batzordeak proposatuta, Batzorde Orokorrak ohorezko elkargokide izendatu ahal izango ditu lanbideari dagokionez merezimenduak jaso izana edo zerbitzu garrantzitsuak eman izana egiaztatzen dituzten pertsona fisiko edo juridikoak. Saria, hala badagokio, hil ondoren eman ahal izango da.

2. Gobernu Batzordeak proposatuta, Batzorde Orokorrak ere dekanonizaera eman ahal izango du ohorezko titulu gisa. Sari hori merezi duten pertsonak jasoko dute, beren ezaugarri profesional eta sozial apartekoengatik eta prokuradoretzaren defentsa, garapen eta hobekuntzan egiten duten ekarpenengatik.

#### **87. artikulua. Beste sari batzuk.**

1. Elkargoko Gobernu Batzordeak ohorezko beste sari ekonomiko-

zientifiko batzuk eman ahal izango ditu.

2. Ohorezko sariak honako hauek izan daitezke: zorionak eta aipamenak; kondekorazio ofizialak proposatzea; ohorezko kide izendatzea, eta Elkargoaren Ohorezko Domina ematea.

3. Sari ekonomiko-zientifikoak Gobernu Batzordeak unean-unean erabakitzen dituenak izan daitezke, eta Gobernu Batzordeak emango ditu. Sari horiek honako hauek izan daitezke: ikerlanentzako eta argitalpenentzako sariak, elkargoaren kontura; unean-unean editatzea erabakitzen den balio zientifiko edo ikerketa-balio nabarmeneko lanak izango dira horiek.

#### **88. artikulua. Ohorezko eta protokolozko tratamenduak.**

1. Bizkaiko Auzitegietako Prokuradoreen Elkargoak ospetsu tratamendua izango du. Dekanoak Justizia Auzitegi Goreneko salako presidentearen ohorezko izaera izango du. Hegaltxodun toga eramango du, baita bere karguari dagozkion dominak eta plakak ere, jendaurreko agerraldietan eta ekitaldi ospetsuetan, horietan parte hartzen dutenean.

2. Halakoetan, elkargoko Gobernu Batzordeko gainerako kideek

beren karguen berezko ezaugarri gisa erabiltzen jarraituko dute elkar-goaren zilarrezko plaka eta 1903ko ekainaren 26ko Errege Aginduari jarraiki sortutako domina.

#### **IV. KAPITULUA.- ESTATUTUAK ALDATZEKO PROZEDURA**

##### **89. artikulua. Ekimena.**

1. Estatutu hauek aldatzeko ekimena Gobernu Batzordeari dagokio, botoen gehiengo osoz hartutako erabakiaren bidez, edo elkargokide guztien ehuneko hogeita bostek sinatutako eskaeraren bidez.<sup>77</sup>

2. Ekimen-akordioek testu artikulatu bat izan beharko dute, proposatzen den aldaketa partzial edo osoa jasoko duena.

##### **90. artikulua. Prozedura.**

1. Ekimena erabaki ondoren, Gobernu Batzordeak elkargokide guzti-ei helaraziko die, hilabeteko epean egokitzat jotzen dituzten oharrak, alegazioak, zuzenketak edo testu alternatiboak egin ditzaten.

2. Ezin izango zaie zuzenketarik aurkeztu ekimenak zehazki aipatzen dituen artikuluez edo manuez bestelakoei. Gobernu Batzordeak atzera botako ditu, arrazoituta, baldintza

hori betetzen ez duten edo, formalki betez gero, ekimenean adierazita-koez bestelako manuei eragiten dieten zuzenketa guztiak, eztabaidan sartzeko, eta bere erabakiaren aurka ezin izango da inolako errekurtsio korporatiborik aurkeztu.

3. Aurreko apartatuan aipatutako epea amaitu eta hurrengo hamar egunen barruan, dekanok ezohiko batzorde orokorrerako deia egingo du, aldaketa eztabaidatu eta onartzeko, hala badagokio.

4. Aldaketa Batzorde Orokorrek bozkatuko du, eta gehiengo osoa lortuz gero, onartu egingo da.

5. Onartu ezean, dekanok hilabeteko epean beste ezohiko batzorde orokor baterako deia egingo du, eta gehiengo soiluz onartzea nahikoa izango da.

6. Manu honetan aurreikusitako aldaketa-prozedura estatutuen aldaketa partzialei eta estatutuen erabateko aldaketari aplikatuko zaie.

7. Aldaketa onartu ondoren, Eusko Jaurlaritzan lanbide-elkargoen arloko eskumena duen sailari jakinaraziko zaio, azaroaren 21eko 18/1997 Legearen 33.3 artikulua ondu-otarako. Horrekin batera, Batzorde Orokorren bilkuraren akta aurkeztuko da, prozedura bete dela egiaztatzen duen baldintzapeko ziurtagiriarekin, bai eta Auzitegietako Pro-

---

<sup>77</sup> 18/1997 Legearen 33.3.j) artikulua

kuradoreen Kontseilu Nagusiari eta Euskal Autonomia Erkidegoko Prokuradoreen Kontseiluari ere.

## **V. TITULUA.- ARAUBIDE EKONOMIKOA.**

### **91. artikulua. Ekonomia- eta finantza-autonomia.**

BAPEOk ekonomia- eta finantza-autonomia du bere helburuak eta funtzioak betetzeko.

### **92. artikulua. Baliabide ekonomikoak.**

1. Hauek dira elkargoaren ohiko diru-sarrerak:

a) Elkargoaren ondareko ondasun eta eskubideen produktuak.

b) Prokuradoreen kontribuzio ekonomikoak, hurrengo artikuluan xedatutakoaren arabera.

c) Bere artxiboetan dauden datuen edo dokumentuen ziurtagiriak edo kopiak edo hark ekoiztako dokumentuen kopiak egiteagatik jasotako zenbatekoak.

d) Txostenak, irizpenak, azterlanak eta elkargoari eskatzen zaion beste edozein aholkularitza egiteagatik ordainsariak, bai eta arbitrajeak eta bitartekaritzak onartu eta administratzeagatik eskubideak ere. Zenbateko horiek ez dira inola ere elkargoak prokuradoreei dagozkien zerbitzu profesionalak ematek etorriko.

e) Bere argitalpenengatik edo egiten dituen ordaindutako beste zerbitzu edo jarduera batzuegatik lortzen dituen onurak.

f) Beste edozein kontzepturengatik legez bidezkoak direnak.

2. Hauek dira elkargoaren aparteko baliabideak:

a) Administrazio publikoek eta gainerako erakunde publiko edo pribatuek ematen dituzten dirulaguntzak, baldin eta horien azken xedea dirulaguntza horiek emateko arauen mende geratzen bada.

b) Elkargoa onuradun izan daitekeen dohaintza, jaraunspen edo legatuak.

c) Bere ondareko ondasunak besterentzearen emaitza.

d) Besteren ondasunak administrazioetatik elkargoari edozein kontzeptutan dagozkion zenbatekoak.

e) Publizitate-babesletzako diru-sarrerak.

f) Ezarritako isun-zehapenen zenbatekoa.

g) Beste edozein kontzepturengatik legez bidezkoak direnak.

### **93. artikulua. Prokuradoreen kontribuzioak.**

1. Prokuradoreen kontribuzio ekonomikoak dira:

a) Elkargoan sartzeko kuota. Zenbatekoa ezin izango da izan, inola ere, sarrera izapidetzearekin lotutako kostuak baino handiagoa.<sup>78</sup>

b) Ohiko kuota finkoa. Aldizkakoa izango da, eta berdina izango da jarduneko elkargokide guztientzat.

c) Lanbide-jarduketengatiko kuota aldakor gisa sortzen diren esku-bide ekonomikoak.

d) Ezohiko kuotak edo elkargoko derramak.

e) Hala badagokio, elkargoaren zerbitzuen erabilera bereziagatik ezartzen diren zenbatekoak.

2. Batzorde Orokorrek zehaztuko du elkargoaren kontribuzioen zenbatekoa, Gobernu Batzordeak proposatuta.

3. BAPEOren eremuan jarduera profesionalak burutzen dituzten beste elkargo bateko prokuradoreei ezin izango zaizkie eskatu sartzeko kuotak, ohiko kuota finkoak, ezohiko kuotak edo elkargoko derramak.

### **94. artikulua. Aurrekontu-araubidea.**

1. Elkargoaren araubide ekonomikoa aurrekontuan oinarrituko da. Aurrekontua urtekoa, bakarra eta orekatua izango da, eta elkargoaren urte naturaleko sarrera, gastu eta inbertsio guztiak bilduko ditu.

2. Aurrekontu bakoitzean behar bezala zehaztuko dira elkargo-organismoek garatuko duten jarduera-programaren arabera aurreikusitako gastuak, bai eta dagokion ekitaldian sortuko diren diru-sarrerak ere.

### **95. artikulua. Auditoretza.**

Gobernu Batzordeak kontu-auditore bat izendatuko du, eta kontu-auditore horrek aurrekontu-ekitaldi bakoitzari dagozkion kontu-

---

<sup>78</sup> LELren 3.2 artikulua.

ak ikuskatuko ditu, hargatik eragotzi gabe Herri Kontuen Euskal Epaitegiari dagokion fiskalizazio-funtzioa, haren lege arautzaileak xedatutakoren arabera.<sup>79</sup>

#### **96. artikulua. Ondarea eta haren administrazioa.**

1. Elkargo bakoitzaren ondarea bere ondasun, eskubide eta betebeharrak guztiek osatzen dute.

2. Gobernu Batzordeak administratuko du elkargoaren ondarea.

#### **97. artikulua. Enplegatuak.**

Gobernu Batzordeak elkargoko enplegatuen plazak betetzeko deitzen diren lehiaketak arautuko dituzten oinarriak onartuko ditu, eta lanpostu hutsak edo lanpostu berriak betetzeko izendapenak egingo ditu, korporazioaren beharren arabera.

---

<sup>79</sup> 18/1997 Legearen 50.3 artikulua

## VI. TITULUA.- ELKARGOA DESEGITEA.

### **98. artikulua. Desegitea.**

1. BAPEO Eusko Legebiltzarren lege bidez baino ezin izango da desegin, baldin eta jarduneko elkar-gokide guztien gehiengo osoak Batzorde Orokorrean hala erabakitzen badu. Erabaki hori hartu ahal izango da, baldin eta jurisdikzio-organoen aurrean prokuradorearen esku hartzeak nahitaezkoa izateari uzten badio oro har, lege prozesalen arabera.

2. Batzorde Nagusiak desegiteko hartutako erabakia betearazteak likidazio-aldia irekiko du. Desegiteko erabakiak bere ondarea, eskubideak eta betebeharrak likidatzeko prozedura ezarriko du, eta gerakinaren xedea finkatuko da, halakorik balego, Batzorde Nagusiak erabakitzen duenaren arabera.<sup>80</sup>

---

<sup>80</sup> 18/1997 Legearen 31 artikulua.

### **Lehenen xedapen gehigarria. Prokuradoreak izendatzea ez badaude edo gaixorik badaude.**

Jarduneko elkargokideren bat ez badago edo gaixorik badago eta haren ordezkorik izendatu ez bada, dekanoak izendatuko du, harik eta ahalorde-emaileak zer egitea komeni den erabaki arte edo ordezkape-naren inguruabar erabakigarria igorri arte; dagozkion jurisdikzio-organoei jakinaraziko die.

### **Bigarren xedapen gehigarria. Genero gramatikala.**

Dokumentu honen gaztelaniazko bertsioa markatu gabeko genero maskulinoan dago idatzita. Beraz, testuaren aipuak egitean, sexu femeninoko pertsoneri buruzko edozein aipamen egin nahi denean, aipamena dagokion generoan egin daiteke zuzenean.<sup>81</sup>

### **Lehen xedapen iragankorra. Auzitegietako prokuradorearen lanbi-**

### **dean aritzeko gaitzen duen lanbide-tituluaren eskaera eta legezko salbuespenak.**

Estatutu honen 10.1.b) artikulua auzitegietako prokuradorearen lanbidean jarduteko gaitzen duen lanbide-titulua elkargoan sartzeko nahitaezko baldintza gisa eskatzen badu ere, Abokatutzan eta auzitegietako prokuradoretzan sartzeari buruzko urriaren 30eko 34/2006 Legearen zortzigarren xedapen gehigarrian, bederatzigarren xedapen gehigarrian eta xedapen iragankor bakarrean ezarritako salbuespenei kalterik egin gabe ulertu behar da hori.

### **Bigarren xedapen iragankorra. Elkargoko gobernu-karguen aginduak.**

Elkargoko egungo gobernu-organotako kideek beren karguetan jarraituko dute, indarrean dagoen agintaldia amaitu arte. Une horretan hautatu egingo dira, estatutu honetan xedatutakoaren arabera.

### **Hirugarren xedapen iragankorra. Baliabideak.**

Hala badagokio, estatutua indarrean sartzean izapidetzen ari diren errekurtsok estatutuari jarraituko diote, errekurtsoa jarri zen unean indarrean zeuden arauen arabera.

---

<sup>81</sup> Ondorio horietarako, ez da beharrezkoa bereizitako izendapena egiteko erro bereko kolektiboetara edo epizenoetara jotzea (adibidez, prokurako profesionala), Espainiako Errege Akademiaren gomendioei jarraituz. Gomendio horiek "Informe sobre el lenguaje inclusivo y cuestiones conexas" txostenean jaso dira, bereziki "Sobre sexismo lingüístico, femeninos de profesión y masculino genérico. Posición de la RAE" dokumentuan.

**Azken xedapenetatik lehena.  
Egokitzapena eta arau-garapenak.**

1. Elkargoak estatutu honetako aurreikuspenetara egokituko du elkargoaren barne-araudia.

2. Egokitzapen hori egiten den bitartean, elkargoaren barne-araudiak indarrean jarraituko du estatutu honetan xedatutakoaren aurka ez don neurrian.

**Azken xedapenetako bigarrena.  
Indarrean sartzea.**

Estatutu hau Euskal Herriko Agintaritzaren Aldizkarian argitaratu eta hurrengo egunean jarriko da indarrean.

**Xedapen indargabetzaile bakarra.  
Efektu indargabetzaileak.**

Estatutu hau indarrean sartzeak Bizkaiko Prokuradoreen Elkargo Ospetsuaren estatutuak indargabetzea ekarriko du. Estatutu horiek Justizia, Lan eta Gizarte Segurantza sailburuaren 2008ko urriaren 10eko AGINDUAren bidez onartu ziren.